

蘇魏公文集

萬靈著

蘇魏公文集卷六十四

宋太子太保右僕射同中書門下平章事司空魏國公蘇頌撰

逢年舜晬

裔孫萬靈錫經重祿

記

晉爵耀庭

江寧縣令題名記

縣令題名舊無其傳某始到職以非便民先急之務而未遑經營也一日鄉民有訟田者辭連數室咸造於庭紛辨交爭初莫能決訊其劑約則曰亡之矣訊其移受之始曰不能記矣所能言者某令時按某事至某之隣鄉實某祖受田立籍之歲也縣有版籍蓋載之矣因求其令在事之年而邑之胥吏皆無能言者乃為之据撫數十年簿書始見其令之官氏閱其籍果得訟田者之祖名具載其地數而假冒者乃誣某於是歎曰昔之居官者去而留名氏記歲月於府寺豈特好事者為之哉是亦有謂爾斯獄也以令之官寺乃得致訟之歲月因版籍而後知民之情偽版籍雖具而民不能言其歲月縣令雖去而民猶能言其為治之迹是令去而題名於後不為無益於治理也於是條令前令官稱姓名起開實李氏去國郡

邑歸職方始命王官迄茲慶歷六年凡七十載歷三十八令而拙者繼焉因命磬石紀其交承之次第竊於聽事之壁間非惟紀乎歲月而已又念夫居是職者坐廣居享豐祿假天子威刑案籍以蒞職事其不能履體以督簿書之務平心以待生齒之訟殆非朝廷所以建官分職之意也矧在是邑密負大府號為望縣其地之廣袤百里有畸編戶逾二萬而間年逋逃未復者且千齒倍戶有半而隸名於力役胥徒者幾三十之一其賦徭之重輕資貨之移用兼并之強弱紛爭之是非蓋曰有馬一繫乎長人者之決之也苟失其當民實受弊在治者得不為之用心哉故予因紀年而又論政又書其命事之由於左右方將以告於民官庶幾悉意民務毋俾其人曰某令者治某事而非是吾將何告焉姑待來者聽治之非惟警於來者抑將以自警焉則曰升斯堂而受牒訴舉而視之曰前日某事其人稱某令之不治則予之弊事必將審覆其詞而求索其情亦莫臻夫理而少紓其責也

起居院題名石柱記

國朝淳化中始命史館修撰梁周翰直昭文館李宗諤知起居郎舍人事番直便殿以備左右史之職未幾更日同修起居注常以館閣二人兼領之天聖景祐以來其選益重至有載筆未及書事而遷職禁序者嚮非久於鉛槧或已陟近省則

莫得而進補馬院在朝堂西便門之左廡舊有板記載到官去事之歲月訖治平初而板盡不續於是資政郡公始議易以石柱六年於茲礮剽甫就凡書記之法姓氏官閥先後相續一用舊次間或差漏則以記史訂正自梁李至今蔡孫二君總百四人二君以謂異時省寺始至之日皆親題名於石而近之由是職而上遷者多在朝廷將修臺閣之故事宜得羣賢之翰迹用是歷請自丞相魯國公而下得手筆者十六人不鄙謂予曩嘗承乏俾敘事始刊於左方若乃陟降軒墀書記言動以簡牘之任而列從官之籍地清而近事守隨重故題述之義不獨矜仕進之榮遇亦所以虔君命而謹職業則後之繼踵而至者豈得而廢茲熙寧某年月

審刑院題名石柱記

府寺題名所以記初拜職者官秩名氏暨臨泣之歲月蓋有司榮事任而警位者也審刑院舊以板記揭於樞間年世寔遠鉛墨侵剝殆不可讀熙寧八年正月院長主客郎中崔君易以石柱冀堪永久其題自樞密直學士李公昌齡而下至君凡一百一十九命總九十七人先後相續書用舊法謂某嘗更承攝且繼先人之緒業宜詳知本末見屬敘事以記更置之所自云國初革五代因循之弊臺閣故事草創未具天下奏獄但隸大理刑部二司議上政府進熟報下即決太宗皇帝

仁明撫運燭見至理以謂文吏巧詆不盡哀矜執政大臣非所以責於平亭也於是特詔以淳化二年八月置院禁中命近臣一員知院事以朝臣六員為詳議官專治斷讞不兼別務其廩賜優異燕見款數固不與諸司等比凡州郡重辟之疑可矜若一命私犯罪答以上之罰與夫律令格勅之弊當更者皆先由大理論定然後院官叅議議合然後覈奏畫旨送中書案實奉行其慎重如此非特獄無枉濫而已每歲天下之奏常以千數多或倍之其間情涉巨蠹論如律者百纔一二餘從末減不下千人計淳化迄今八十年間其獲全貸蒙自新之人且十數萬矣而吏之承流任事深知上指其聽辭弊訟求所以生之者又可勝記乎議者咸曰用法平恕自書契以來未嘗有也竊尋經傳所載聖王賢主所以慎用刑誅有曰辟勿辟之戒三覆五覆之慮謂之盡矣然皆事出一時非有成憲貽於後代若我朝累聖繼承惟刑之恤遵用寬典百年不易者而復更競其職上下循持杖笞輕科無得擅用禁令纖悉隄防完密雖施之萬世知其不可易也而有司欲通明創造之意參求事理之實將以毗助至治豈易其人哉前此常用禁省名臣委以事柄外廷郎列稀得預選崔君歷試斷議以文無害特膺器使居位四歲號稱辦職故久留不代方且虔恭朝夕以宿其業題刻之建意在善守前憲使來者覽觀因

以知本朝詳刑之明理官稱選之艱又將盡心於例成其於治道豈小補也哉院舊在中書西南隅嘉祐四年詔徙於右掖之西墉外石柱置於聽事之東廡云

潤州州宅後亭記

吳楚之俗大抵信機祥而重淫祀潤介其間又益甚焉民病且憂不先醫而先巫其尤蠹者羣巫掙貨財偶土工狀夔獫傀魑沓陽彷徨之象聚而館之叢祠之中鼓氣縠以與妖假鬼神以譁眾奇袤譎詐之人殖利擅私公行於道顧科禁莫之警也甚矣風俗之窳薄若是長人者獨不能矯其枉而率諸正乎慶歷七年祠曹員外郎彭城錢侯以方聞署等來作民牧下車之初視庶政之苛慝與習俗之抗弊既興且治之細大之務銖兩之奸無所容惟是里巫之蠶俗始未及治明年夏有挾鬼說以邀賄於郡官者吏得以白即命寘於法因大索他黨悉鉤致之斥巫師者數十撤房祀者十餘土木幻誕之容碎於庭幃牀供具之器籍於公架梁植楹蓋瓦級甃積以萬計視之皆良材而有用也乃相治署之西北墉得廣輪方十弓之地有軒宇遺基在焉高山環前長川帶旁下視郭郭闐闐然可以覽土風眺形勝察民物於是頤指工人不日構亭其上凡功費之給畢出於廢祠而無一簣之財取於官府既成題其榜曰某所以志革弊且勵夫汙俗也官僚之暇從賓

客以臨之或目其題而贊之曰美夫吾侯之作斯亭也其有意於民乎因於神巫示昏淫可化而為敦龐也揭石以寄政欲編戶曉然論善道也引美以為戒惡夫流弊久而復遷染也登高以省風雖在豫遊不忘乎拊封略也昔狄梁公之拊循江表李衛公之廉察是邦皆嘗翦除淫祠澄清郡邑當時美之唐史稱焉紀風俗述政事其來舊矣是亦君子善政之義敢鏡諸石以書首事示將來成賢侯之意不以無似見命之辱竊謂是役也既始於巫蠱而終於戒後是豈獨為觀遊燕嬉而作也故著其大者宜詳小者可略後之人登斯亭覽斯文由是知良二千石政事之美本乎革風俗而一中和也

澶州重修北城記

澶古衛地也在春秋時嘗會十一諸侯盟於此歷唐五代暨我朝皆以名州既而又表其軍曰鎮寧以重之自京師在汴是為北門之屏憑深搃衝襟帶燕魏蓋河朔一都之會也州本治頓丘晉天福中始徙於德勝寨方其徙時出多故倉猝間即用舊址挾河橋為二城其規橛固已陋矣而河濱之土疎惡善墮北城之隅復當三掃之敵夏秋洪流暴溢浸淫泛濫大為州患急則料民而繕治之完而復圯者數矣慶歷中州使嘗有增築之議更三太守或營或止卒不克就治平三月三

月給事中天章閣待制李公既領州事患其所以然也將踵前議而即新之詢之屬僚屬僚叶謀請之朝廷朝廷曰俞於是工人程其能羣吏謹其職揆以間月授以事期引鐵丘之土以易朽壤市津門之木以增崇構且也調赤籍之伍以紓民力資回圖之錢以省官用始築於九月二日甲子考成於十一月二日甲子兵馬黔轄某官某官某實董其役通判軍州事鄭某田某總領而臨蒞大凡役六邑義勇兩埽河清諸鋪兵總若干人為城五千七百七十步有畸而外郭水濠之長如之為棚樓五百一十一間而團敵馬面之制隨之西距河孺別為長隄三千五百三十步所以止橫水蓄城之害也並壕外向植桑若干株棗若干株所以代枳棘藩落之衛也直城東西隔斷堤路增二甕城所以絕寇騎奔突之患也惟是郭門之器守禦之備莫不增舊而加葺焉臺高而塹深下厚而上網其堅足以遏湍悍之流其壯足以侈華奮之觀非夫智以經之仁以臨之則渠能即卑為崇撤故為新舉一日之力而收永久之利耶昔春秋所記諸侯之事而土工無大小必書然其美惡或不同者皆指事示後以為法戒也其曰夏城中丘者以重其書也謂其敝不早完使至大壞方夏勞眾而城與始作無異故重其事而譏之其曰冬城諸及防者以時而書也謂其戒民備物興徒竣事皆在農隙之月故謹其時以善之

是役也因基於前謀及城之未毀戒夫春秋所謂重者也自縮版至於工休不盡中冬合乎春秋所謂時者也故作之不勞而成之如素宜其書以告夫來者嗣其休利而裕民於無窮也公名中師以文學政事陟從官治澧踰年而召歸方且大用矣慶歷三太守者某州防禦使郭公承祐龍圖閣直學士張公奎翰林侍讀學士葉公清臣也

楊子寺聲隅先生祠堂記

聲隅先生祠堂者江都縣宰承議郎羅君適所建也先生建安黃氏諱晞字景微年少時以有道稱於閩中泉南陳侯靖福唐陳侯絳在郡日爭以禮延請躬率諸生試聽講義於時士人習尚章句務為奇靡先生獨好古學不與眾合嘗傲論語法言著書十篇其發明聖賢道義之隱微與古今治理之得失詳矣自題其篇為聲隅子歛歆瑣微論其解曰聲隅者拊物之名歛歆者兼嘆之聲瑣微者述之之謂蓋自因言以顯志也景祐中先生年四十矣始隨鄉貢至禮部又上五十策求應直言詔科俱以後時不得與試已而嘆曰老大不偶若此豈能復從諸少年校程式於場屋間乎可以逝矣然欲閱天下義理觀未見之書莫若居京師為得計遂傲舍僻處而士子競造其門先生之學無所不通尤潛心者春秋易也其說以

左氏凡例為得聖人之微鄭康成象數極天地之蘊學者校量攻擊終莫能窮異
突丞相武寧章公以其鄉人召置門下權利所處非所樂也時我先人方在臺省
早聞其風下榻以招之先生欣然相就既一授館凡歷五期某日與之遊切劘論
難愈久不窮後十餘年某復仕朝廷先生猶居陋巷晏如也又著楊庭新論十篇
其指陳當世之務有若言禮樂述作之所由則太常寺卿論是矣言郡國武備之
廢置則九州刺史論是矣餘篇悉然蓋欲見於行事者也方是時公卿大夫交章
論薦者數十人朝廷用丞相韓公言將以為國子監直講先生自謝於富丞相曰
老生豈任仕宦者耶必不可辭願得七品閒官還南方足矣仁宗皇帝聞而異之
特詔授太學助教致仕從其志也嘉祐二年四月無疾卒於隆和坊僦舍死之日
囊無餘貲惟所蓄書數萬卷存焉一子在遠不及治命門人范遷張粵議以某為
知先生之深者宜主其後走僕來告某即日往哭其尸為買棺就殮且謀寄骨郊
寺翌日魏公遣使為斡殯具又莫之以文其略曰先生之道德不用於朝宰相之
過也聞者莫不痛先生之有時無命而稱魏公之推賢抑己也未幾其子某自南
方來挈旅櫬載遺書以去過江都棗殯於楊子寺後圃既而交遊故人共為復土
就葬其地其未葬也川陸之經由者識與不識皆過其下咨嗟留連或為歌詩哀

辭或書名屋壁至于木膚竹籜題記殆遍其無位而得民至誠而感物近世未有也羅君涖邑之始首來奠謁因覽封鬣黯然悽愴且謂大儒不祀後世何觀昔汝南先賢列城圖其像有吳君子仲尼表其墓思人尚德由古而然於是即其故墟規度餘地增土於上者幾倍而構堂其旁者幾椽設像中楹儼乎惟肖凡材力之費悉出俸泉不勞於人已日而就兆域有表松檟有序所以示乎來者蓋有激於風義落成之日遠近來觀且欲記其經始之由載其始卒之行列刻諸金石託文舊交予惟先生之道生不得亟行於時死而有名卿巨公周恤其後事歲月久矣餘芳邈焉又有賢令宰為之封植幽壤表章命名則後來之人有踐斯地登斯堂挹先生之遺風知大雅之不改雖綿祺寔遠棟宇其頽又將繼而新之廟食茲邦悉範來裔孰謂先生無後乎

沂州承縣崇勝寺重修上生院記

崇勝古寺也在承之西隋開皇十六年初建於甌州號維衛未幾與州俱廢至唐初復興屋載三百州縣或降或徙而寺不復毀國初太平興國三年遂賜今額而隸邑籍焉由寺之西岸其別院曰上生實行疑海靜二上人之經始也疑東京人少受具於景德寺西禪院有經論學通上生百法二教開演既久學徒寔廣應請

茲地遂為下方至則視棟宇之摧落風雨無以庇覆乃條其佛事之不如儀者以告於邑人謀所以新之積勤累勞垂二十年而基構始就既老且死眾以其事屬於靜又八年乃克成之凡為屋僅二百楹堂皇階庭門阿環合佛寢僧廬亦既完具又冶鐵為像三十一軀坐立侍衛品地有序圖形賦采悉如教相於是緇徒知所以宴息里閭知所以信向或曰茲吾邑之崇觀不可以無紀也靜乃狀其事因宗秀師求文以刻於石秀愿士也往來沂魯間尤樂其土俗以謂承本蘭陵故地多楚漢聖賢遺迹是宇也雖無奇偉絕異之觀而當往來走集之會將勤館人此焉其歸予雖未嘗過而游之然而望荀卿之舊邦想二疏之清塵因欲載文其地以寄懷古之思異日有來觀之當為我留連於茲以訪耆舊之遺說也

靈香閣記

棟宅可以庇風雨臺榭可以遠燥濕庭除可以肅賓客山川可以廣眺望此居處之壯觀也而為浮屠之說者則不然曰不闕偉不足以容眾大不盛麗不足以來信向故惟善經構者增飾窮年而不已既而已闕麗矣而吳越之俗猶以為未也丹雘金碧斷磬炫焜至於殫人之財極工之巧而不知止故其山林之峻深郊郭之爽塏幽人之所卜智士之所營非為浮屠者不得而居有也思允師居睦州甌

率寺之法華院佛學之外兼妙歧黃之術有以疾病告者必盡其技而為之診視凡湯液之所餌砭針之所加無不如期而應自郡官至於編戶皆稱其方技之神良而功施之周普由是車馬之踵門者日月相繼而不絕也嘗患其居宇之湫陋賓至無所容遂闢故址革而新之又於其傍為閣五間楹榻崇高軒檻虛朗經像嚴於中草色蓄於次齋房客館左右布列藥欄花園前後相望升其堂則聞芝木之芬氤游其庭則見竹樹之蔭翳雖密邇闐闐而山居巖處之趣備焉考成之日太守集賢王微之率賓僚燕飲其上且嘉儲峙之美因題其顏曰靈香又賦詩以紀其事繼而作者貳車史館劉元忠也觀二詩則院與閣之所有皆可見矣後三年予自東陽赴亳社憇郡郵會故人留止過允之居因得一遊目焉嘗謂桐廬郡溪山之清絕自晉宋以來文士多稱述之往往載於題咏觀夫城邑間井皆坦塗平陸蓋與他州無有異也及登高而望則羣峯回環一水縈帶煙雲晦靄朝暮異狀不離指顧而萬景在目信乎吳越之佳郡前人之所稱詠不為虛談也而茲閣又占一郡之勝處高高下下皆有幽致足為端居造適之樂復以甘辛寒溫之上味給人朝夕之求其為利固已博矣然則不得與夫競土木而誇闐麗者並也宜乎微之元忠嘆賞之勤勤如此因書所見以繼二詩之後云

温州開元寺重修大殿記

古聖人立言垂教皆所以長世而利物也至若道被幽顯而不遺事見久遠而易信者其惟浮屠氏之法乎自中國達於蠻夷自郡縣至於鄉聚凡在含識無有愚智一聞其說靡不歸誠而信向焉由漢迄今千有餘歲雖世教有隆替而佛事未嘗廢絕者以其為道一本於人心人心欲安樂則曰積德重者能享之人心惡罪苦則曰殖福厚者能去之故塔廟布於四方像設備於家戶猶以為奉之未至也今夫吳越之俗以薰修相勝至於傾竭財力而不為勞崇飾土木而不知止是孰毆之使然耶皆至誠悃福生於信心故莫之能禦也先是永嘉郡火始作於民廬延及官寺遂建僧舍所謂開元寺者東南之壯觀也一旦煨燼人用愁戚其欲興造切於己居寺僧擇隨素有行願知眾人之所欲為也於是盡發私橐以圖修復之役且謂築室者始乎成寢治寺者先乎抗殿乃即故地規創新宇料工度材初亦無求於外而郡之大姓聞風響應願心而樂施者不謀而同焉締構既有日矣適會擇隨順世其徒曰有英等六輩閔師之艱勤齋志而歿共誓戮力繼成其事指期促辦卒亦如師之素焉粹其資費幾數千萬凡為殿之堂室暨四旁環屋曰遊巡者總三十有一間其崇七尋其深倍之其廣益深之半中楹塑大像者三左

右立像者十妙嚴之相高廣之坐瓔珠之具金采之飾一倣其教之所述焉既而緇俗競勸合為廊宇房闥者繼踵而畢事不及三年重門周閣廣居大厦巋然如初而闕侈巨麗又非曩日之儼也按寺本東晉郡人李整之所捨宅也歸佛於大寧之二禩得號於開元二十六年中廢於昭肅之初復造於宣皇之季火於治平之乙巳完於熙寧之癸丑六百年間再毀而再復終不可廢也向非人情之所欲為與僧志之不可奪則渠能集大緣於一時復已廢之頽址耶夫人情之所欲為功雖大而易就蓋不强之使然耳下之人能不強人者其興事也猶若此之速然則為治者亦有不強人之政乎以之興事而就功况於是其猶反掌歟熙寧十年三月二十二日

錫山唱和詩石刻記

先公宰無錫日某方在羈貫稍涉人事因得拜接邑尉竇公總之特蒙知獎相與抗禮公以文學登雋科尉大邑先公器其才識期以遠到每賓從賞會莫不同之或遇欣適則形於篇詠時公春秋方盛未有嗣子嘗得異夢先公為之診曰是男子之祥且貴兆也後十月實生彥法天章先公即以詩慶之有仙果遲遲生海中平時曾說夢維熊及駟馬定應高慶閱五龍從此繼英風之句某親侍左右目

觀其事無幾何薄祜早孤流離多難數與公相遇顧愛益親後彥法擢殊科某叨
預考官獲觀奏賦既而復同館閣不替世舊猥以父執見推不幸二公相繼殂謝
再有寢門之慟前歲小子詒作尉茲邑值公之季子亦領丞事父祖舊治繼為同
僚累代周旋風義尤篤一日詒於僧舍得唱和遺篇方且更以石刻縣丞君以為
當時事迹莫若某經見之詳以書見抵俾敘始末某追念疇昔忽五十年罄俊緒
言才若俛仰因念昔人有居父官不敢當舊位坐卧皆易其處前史稱之今丞尉
卑秩而所居又非舊位雖無可避者然而井邑亭舍欸識猶存歲月緬然手澤未
泯吏民觀者猶有餘思子孫對之能不感愴某既嘉縣丞君不忘先志又喜詒繼
託末光而某雖未嘗從事於彼然得綴名於後亦足以慰遠慕之懷茲為願幸也
故敢備言之若其諸公官伐洎題載歲月詒已敘於前茲不復紀刊石後月日具

官某謹記

蘇魏公文集卷六十四終

蘇魏公文集卷六十五

宋太子太保右僕射同中書門下平章事司空魏國公蘇頌撰

逢年

裔孫萬靈重刊

序

耀庭

補注神農本草總序

舊說本草經神農所作而不經見漢書藝文志亦無錄馬平帝紀云元始五年舉天下通知方術本草者在所為駕一封軺傳遣詣京師樓護傳稱護少誦醫經本草方術數十萬言本草之名蓋出於此而英公等注引班固敘黃帝內外經云本草石之寒溫原疾病之深淺此乃論經方之語而無本草之名唯梁七錄載神農本草三卷推以為始斯為謬矣或疑其間所載生出郡縣有後漢地名者以為似張仲景華陀輩所為是又不然也淮南子云神農嘗百草之滋味一日而七十毒由是而醫方興焉蓋上世未著文字師學相傳謂之本草兩漢以來名醫益眾張機華陀輩始為之編錄耳然神農舊經才三卷藥止三百六十五種至梁陶隱居又進名醫別錄以三百六十五種因而注釋分為七卷唐顯慶中監門衛長史滕

恭又撫其差謬表請刊定乃命司空英國公李世勣等與恭參考得失又增一百一十四種分門部類廣為二十卷世謂之唐本草國朝開寶中兩詔醫工劉幹道士馬志等相與撰集又取醫家常用有效者一百三十三種而附益之仍命翰林學士盧多遜李昉王祐扈蒙等重為刊定乃有詳定重定之目並鏤版模行由此醫者用藥遂知適從而偽蜀孟昶亦嘗命其學士韓保昇等以唐本并圖經參比為書稍或增廣世謂之蜀本草今亦傳行是書自漢迄今甫千歲其間三經誤著所增藥六百餘種收采采廣可謂大備而知醫者猶以為傳行既久後來講求浸多參校近之所用頗亦漏略宜有算錄以備頤生敲疾之用嘉祐二年八月有詔臣禹錫等再加校正臣某等亦既被命遂更研覈竊謂前世醫工原診用藥隨效輒記遂至增多概見諸書浩博難究雖屢加刪定而去取非一或本經已載而所述精略或俚俗嘗用而太醫未聞向非因事詳著則遺散多矣乃請因其疏梧更為補注應諸家醫書藥譜所載物品功用並後採掇唯名近迂僻類乎怪誕則所不取自餘經史百家雖非方餌之急其間或有參說藥驗較然可據者亦兼收載務從該洽以副詔意凡名本草者非一家今以開寶重定本為正其分布卷類經注雜揉間以朱墨並從舊例不復釐改凡補注並據諸書所說無所刊潤其意義

與舊文相參者則從刪削以避重複其舊已著見而意有未完後書復言亦具存之欲詳而易曉仍每條並以朱書復言亦具其端云臣等謹按書某云某事其別立條者則解於其末云見某書凡所引書以唐蜀二本草為先他書則以所著先後為次第凡書舊名本草者今所引用但著先後作人名曰某人云惟唐蜀本則曰唐本云蜀本云凡字朱墨之別所謂神農本經者以朱字名醫因神農舊條而有增補者以墨字間於朱字餘所增者皆別立條並以墨字凡陶隱居所進者謂之名醫別錄並以其注附於末凡顯慶所增者亦注其末曰唐本先附凡開寶所增者亦注其末曰今附凡所增補舊經未有者於逐條後開列云右幾種臣等續添凡藥舊分上中下三品今之續添難於詳辨但以類附見如綠礬次於礬石山薑花次於豆蔻扶移次於水楊之類是也凡藥有功用本經未見而舊注已曾引據今之所增但涉相類更不立條並附本注之末曰續附如瓦苔附於垣衣燕覆附於通草馬藻附於海藻之類是也凡舊注出於陶氏者曰陶隱居云出於顯慶者曰唐本注出於開寶者曰今注其開寶考據傳記者別曰今按今詳又按皆以朱字別於其端凡藥名本經已見而功用未備今有所益者亦附於本注之末凡藥有今世已常用而諸書未見無所辨證者慮其傳聞非審亦所不載如葫蘆谷

海帶之類當別為圖經以詳著之舊藥九百八十三種續添八十二種附於注者不預焉新定一十七種總新舊一千八十二條皆隨類粗釋推以十五凡則補注之意可見矣舊著開寶英公陶氏三序皆有義例所不可者仍載於首篇臣等所被校正詔書曰神農本草今既成書因以題篇不復加別號云

本草後序

嘉祐二年八月三日詔旨朝廷頒方書委諸郡收掌以備軍民醫疾訪聞貧下之家難於檢用亦不能修合未副矜存之意今除在京已係逐年散藥外其二京并諸路自今每年京府節鎮及益井慶渭四州各賜錢二百貫餘州軍監賜錢二百貫委長史選差官屬監勒醫人體度時令案方合藥候有軍民請領畫時給付所有神農本草靈樞太素甲乙經素問之類及廣濟千金外臺秘要等方仍差太常少卿直集賢院掌校禹錫職方員外郎秘閣効理朴億殿中丞秘閣校理張洞殿中丞館閣校勘蘇恭同共校正聞奏臣禹錫等尋奏置局刊校并乞差醫官三兩人同共詳定其年十月差醫官秦宗古朱有章赴局祇應三年十月臣禹錫臣億臣某臣洞入奏本草舊本經注中載述藥性功狀甚有疎略不備處已將諸家本草及諸書史中應係該說藥品功狀者採拾補注漸有次第及見唐顯慶中詔修

本草書當時修定注釋本經外又有諸般藥品繪畫成圖及別撰圖經等辨別諸藥最為詳備後來失傳罕有完本欲下諸路州縣應係產藥去處並令識別人子細辨認根莖苗葉花實形色大小并蟲魚鳥獸玉石等堪入藥用者逐件畫圖並一一開說著花結實收採時月及所用功效其蕃夷所產藥即今詢問權場市舶商客亦依此供析并取逐味各一二兩或一二枚封角因入京人差齋送當所投納以憑昭證畫成本草圖并別撰圖經所冀與今本草經並行使後人用藥知所依據奏可至四年九月又准勅差太子中舍陳檢同校正五年八月補注本草成書先上之補注本草所引書傳內醫書十六家援據最多今取撰人名氏及略述義例附於末卷庶使覽之者知所從來餘非醫家所切不復存此

本草圖經序

昔神農嘗百草之滋味以救萬民之疾苦後世師祖由是本草之學興焉漢魏以來名醫相繼傳其書者則有吳普李嘗之藥錄陶隱居蘇恭等注解國初兩詔近臣總領上醫兼集諸家之說則有開寶重定本草其言藥之良毒性之寒溫味之甘苦可謂備且詳矣然而五方物產風氣異宜名類既多贗偽難別以虺牀當藤蕪以薺芑亂人參古人且猶患之况今醫師所用皆出於市賈市賈所得益自山

野之人隨時採獲無復究其所從來以此為瘵欲其中病不亦遠乎昔唐永徽中
刪定本草之外復有圖經相輔而行圖以載其形色經以釋其同異而明皇御製
又有天寶單方藥圖皆所以敘物真濫使人易知原診處方有所依據二書失傳
且久散落殆盡雖鴻都秘府亦無其本天寶方書但存一卷類例粗見本末可尋
宜乎聖君哲輔留意於蒐輯也先是詔命儒臣重校神農本草等凡八書光祿卿
直秘閣臣禹錫尚書祠部郎中秘閣校正臣億太常博士集賢校理臣某殿中丞
臣檢光祿寺丞臣保衡相次被選仍領醫官秦宗古朱有章等編繹累年既而補
注本草成書奏御又詔天下郡國圖上所產藥本用永徽故事重命編述臣禹錫
以謂考正羣書資眾見則其功易就論著文字出異手則其體不一今天下所上
繪事千名其詳說物類皆據世醫之所聞見事有詳略言多鄙俚向非專一整比
緣飾以文則前後不倫披尋難曉乃以臣某向嘗刻意此書於是建言奏請俾專
撰述臣某既被旨則哀集眾說類聚銓次粗有條目其間玉石金土之名草木蟲
魚之別有一物而雜出諸郡者有同名而形類全別者則參用古今之說互相發
明其荻梗之細大華實之榮落雖與舊說相戾並兼存之崖略不備則稍援舊注
以足成文意注又不足乃更旁引經史及方書小說以條悉其本原若陸英為葫

蘆花則據爾雅之訓以言之諸香同樹則用嶺表錄異以證之之類是也生出郡縣則以本經為先今時所長次之若菟絲生於朝鮮今則出於宛句奚毒生於少室今乃來自三蜀之類是也收採時月有不同者亦兩存其說若赤箭本經但著採根今乃并取莖苗之類是也生於外夷者則據今傳聞或用書傳所載若玉屑玉泉今人但云玉出於于闐不究所得之因乃用平居海行程記為質之類是也藥有上中下品皆用本經為次第其性類相近而人未的識或出於遠方莫能形似者但於前條附之若搜疏附於枸杞琥珀附於茯苓之類是也又古方書所載簡而要者昔人已述其明驗今世亦常用之及今諸郡醫工所陳經效之藥皆并載其方用天寶之例也自餘書傳所無今醫又不能解則不敢以臆說淺見傳會其文故但闕而不錄又有今醫所用而舊經不載者並以類次系於末卷曰本經外類其功用尤著與舊名附近者則次於逐條載之若通草次於木通石蛇次於石蠅之類是也總二十卷目錄一卷撰次甫就將備親覽恭惟主上以至仁厚德涵養生類一物失所則為之惻然且謂札瘥薦臻四時代有救卹之惠無先醫術早歲屢敕近臣讎校歧黃內經重定鐵艾俞穴或範金揭石或鏤版聯編憫南方蟲毒之妖於是作慶歷善救方以賜之思下民資用之闕於是作簡要濟眾方以

示之今復廣藥譜之未備圖地產之所宜物色萬殊指掌斯見將使合和者得十全之效飲餌者無未達之疑納斯民於壽康召和氣於穹壤太平之致茲有助焉臣學不該通職預編述仰奉宸旨深媿寡聞

校定備急千金要方序

善為醫者察聲色經絡視陰陽氣候以知六疾之所起而取以五辛六苦水火之齊故有通閉解結浣腸滌胃以生易死之妙學其術者大抵以農黃岐伯之經為宗而和扁諸家之說為解漢志所以論著其書列於藝文者誠以歷古所尚王官之守不可闕一也由漢迄唐其道寔廣名醫撰述殆百餘家年世寔遠頗或亡散今之所傳十不存一惟孫思邈備急千金方者首末粗見特為完書然而公私所藏鮮有善本簡編倒錯事理不倫肆習之流常以為患睿孝皇帝至仁卹物留意醫方以謂敵疹淫救昏札保壽命躋康寧無先於此道於是詔命儒臣是正墜失臣某等實被茲選典領有年竊謂孫氏之書精深博贍聞淺見誠難究悉乃自廣內秘聞及民間眾本道藏竺典字篇雜子並用搜訪以資參考得以正其舛互補其遺佚文之重複者去之事之謬戾者易之期年切至頗見領略凡得篇目若干門論若干首方若干道總三十卷皆仍其舊體也其間物有多寡權量不同病

有緩急湯丸異齊鍊治有生熟之節名號有古今之殊文字假借之相通篇名前
後之雜出每用一法皆宜徧知雖有舊凡汗漫難悉今撮其綱條傳以新意別為
總例一篇列於卷首將使披文易曉用藥靡差濟世便民庶幾有功於聖治也昔
劉歆欽方技為四種則有醫經經方房中神仙之別唐令分醫學為五科則有雜
療瘡瘍少小耳目口齒角注之品自是學者各務專門用湯液者或昧於鍼方習
產乳者或乖於雜療自非明智鮮或周知今是書所載始婦女而次嬰孺後丈夫
而終耆耄每敘一病皆先論藏病之稟受又辨脈證之盛衰次審砭艾之所宜乃
明藥石之相應至於吐納宣導飲食補養案摩符禁黃治丹石眾術咸備靡不臻
妙所謂兼劉氏四種之技通唐令諸科之學信不與前古經方相為表裏固非世
醫常流所能彷彿也謹按唐史思邈京兆華原人生於周齊之間而卒於高宗永
淳之世蓋不啻百歲之人也少善談老莊兼綜釋典百家之書後隱居太白山數
被詔起固辭祿仕當時知名之士多師事之盧照隣嘗問名醫治疾之道思邈以
天人相質之說為對照隣深加歎伏為敘其事云道洽古今學通數術高談正一
則古之蒙莊叟深入不二則今之維摩詰觀斯言與其著書則其為人可見矣臣
等固陋之學論次不精仰備奏篇深慚抵牾

後序

孫氏之書特為精博蓋以祖述農黃之旨發明岐雷之奧太古以來奇經秘論無不該綜誠非近世醫流之比擬也臣等既因被詔得以詳求觀其書中引據可以概見者多出素問九樞靈樞甲乙等經黃素錄帙太素巢源古今本草諸家脈法張苗藥對陶弘景論廣劉涓子鬼遺等集金匱玉函肘後百一葛洪必效姚僧坦集驗陳延之小品謝士秦刪繁胡洽郭玉范汪阮炳等方今並參檢本書以正得失其書不傳者則又兼用後人所著出於孫氏者以為證比著五鑒經獨行方崔氏算要延年秘錄外臺秘要貞元廣利李深之手集劉昉得傳信諸方之類亦旁取其所引用以相考質然後遺文疑義瑩然可明又觀前代名流所著醫方往往雜以古人方論不顯所出殆難尋究惟陶隱居廣百一方王燾纂外臺秘要多標題其書名最為明白可以參求今以二書驗之則諸家之菁華悉為孫氏採擇矣而世俗妄人乃稱海上龍宮之事以附致為據誠不足據也近之知醫者每嘆惜前古方書亡失者眾若能盡心於孫氏則其思過半矣謹按孫氏之千方金又有翼方月令等書當別從讎校以備行世此不復悉論也

蘇魏公文集卷六十六

宋太子太保右僕射同中書門下平章事司空魏國公蘇頌撰

逢年

裔孫萬靈重葺

序

耀庭

華夷魯衛信錄總序

元豐四年八月奉詔編類北界國信文字臣竊伏惟念國家奄宅四海方制萬區九夷百蠻罔不率俾瞻茲北陸早已面內章聖皇帝因其喪師請和許通信好歲時問遺寔以修講陛下欽若成憲羈縻要荒及命儒臣討論故事將欲垂於方冊副在有司其所以慮遠防微紆意及此者皆以偃兵息民故也顧臣愚陋不足以奉承明詔黽勉期月初見綱領詮次類例皆稟聖謨前詔斷自通好以來以迄於今將明作書之由故以敘事冠於篇首厥初講和始於繼忠書奏遼主乞盟之請賜以俞旨由是行成故次之以書詔既許其通好乃有載書以著信故次之以誓書昔之和戎則有金絮綵繒之賂我朝歲致銀絹以資其費故次之以歲幣恩意既通又有好貨以將之故次之以國信信好不可單往必有言詞以文之故次之

以國書異國之情非行人莫達故次之以奉使奉使之別則有接送館伴所經城邑郵亭次舍山川有險易道途有回遠若非形於績事則方向莫得而辨也故作驛程地圖前後遣使名氏非一職秩不同南北羣臣交相禮接年月次序散而不齊既為信書不可無紀故作名銜年表夫如是而使事盡矣通好肇於戎人我從而聽之凡問遺之事皆列北使北信北書於前朝廷所遣乃報禮也故載之於後所以著其所從來也凡使者之至在道則有郵館宣勞之儀入朝則有見辭宴賜之式禮意疏數並有節文故次之以儀式又次之以賜予彼待王人亦有常矩無敢違越故以持禮過界及北界分物係於後使者宜通賓主之歡而贊見之禮不可闕也故次之以交馳問勞往返詔宣書劄體範存焉故次之以詔錄又次之以書儀信幣則有齋操之勤導從則有輿隸之眾需眷所及無不均適故次之以例物使者至都上恩顧恤靡所不至或貿易貨財或須索供饋或再求珍異許予多矣故次之以市易而供須求丐附焉南北將命往還約束細大之務動循前比故次之以條例凡此皆常使也誕辰歲節致禮而已至若事干大體則有專使導之故次之以泛使疆場之虞帥守當任其責則接境司州得以公牒往復故次之以文移事非司州所能予奪至待命官及疆吏對議者代州移徒巡鋪界壕是也故

次之以河東地界疆界既辨則邊圉不可不謹故次之以邊防其別則有州郡壁壘之繕完砦鋪塘濼之限斷載於輿地所以示守備之嚴也凡為此書本於通好遼人則彼之種族自出不可不知遼本契丹也故次之以契丹世系遼與中國言語不通飲食不同便習弓馬射獵為生難以常禮拘也朝廷所以能固結而柔服之蓋知其愛好之實也故次之以國俗耶律氏脩好中華有年數矣爵號官稱往往倣效故次之以官屬而宗戚俸祿三者相須並見於後朔漢之俗恃險與馬由古然矣故次之以關口道路又次之以蕃軍馬遼之為國幅員不過三千餘里而並建都府兼致州縣輶車所過宜詳其處故次之以州縣彼荒服也并有奚渤海土外接大荒之境其可見者宜兼著之所以示天聲之遠遠也故終於蕃夷雜錄而經制方界論議奏疏附焉臣竊觀前世制禦朔漢之道載籍所記不過厚利和親以約結之用武克伐以驅除之或卑辭遜禮以誘其衷或入朝質子以制其命漢唐之事若可信也然約結一解則陵暴隨之彼豈不得其術耶蓋恃一時之安而不圖經久之利故也淵謀碩畫無代無之至於我朝乃得上策年歷七紀而保塞無患歲來信幣而致禮益恭行旅交通邊城晏閉黎民土著至老死而不知兵革自書契以來戢兵保定未有如今日之全勝者也聖上方恢天下之度以威懷

遠人猶慮有司慢令取侮遂案圖籍揭為令典使之循守無得而踰後雖有忿驚悍黠之敵欲啟事端繩以章條彼當自屈若然舉遼朔之眾唯上之命則是書之作可謂規撫宏遠而德施無窮矣然以今日承平之勢當彼百年既往之運徂我函煦侈心漸萌侈極而微形兆茲見彙街質館行可致其停入矣今姑撮其大概副聖宸經遠之慮總二百卷卷有植釀則釐為上中下謹條事目具於左方次年編類成書先具目錄進呈六年六月五日蒙降宸筆賜名華夷魯衛信錄

校風俗通義題序

臣所校定風俗通義崇文先闕本臣以私本因官書校定凡十卷謹次第錄謹案范煜後漢書應劭字仲遠汝南南頓人歷太山太守後為軍謀校尉卒於鄴撰風俗通以辨物類名號釋時俗嫌疑文雖不典後世服其洽聞然傳不記其篇卷惟梁錄載風俗通義三十卷隋書經籍志云三十二卷錄一卷唐志亦云三十卷而臣某所傳才十卷初疑闕其下篇歷代諸儒著書引據最多而無若庾仲容子抄馬總意林載之畧備今以其書校之乃篇次不倫然子抄但著卷第凡三十一而不記篇名意林則存篇名而無卷第今校其文意粗可見者獨皇霸一篇同為第一其正失第二子抄云第六魯禮三子抄云第八過譽四子抄云第七十反五子

抄云第九聲音六子抄云十三窮通七子抄云十五祀典八子抄云二十神怪九子抄云三十一山澤十子抄云二十四又意林以祀典篇為儀禮其餘篇名可見者曰心政曰古制曰陰教曰辨惑曰折當曰恕度曰嘉號曰徽稱曰情遇曰姓氏曰諱篇曰釋忌曰輯事曰服妖曰喪祭曰宮室曰市井曰數紀曰新秦曰獄法其書並亡而第八并篇名亦亡又案意林於折當篇載目錄云太山太守臣劭再拜上書曰秦皇焚書坑儒六藝缺亡高祖受命四海乂安往往於壁柱石室之中得其遺文竹朽帛裂殘闕不備至國家行事俗問流語莫能原察故三代遺轡軒使者經絕域採方言令人君不出戶牖而知異俗之語耳此其自敘如此勢當在卷首或卷末今乃云第十以此又知庾馬所載篇第未必當然故不復更改謹以黃紙繕寫藏之館閣

校淮南子題序

謹案班固前漢書淮南王安招致賓客方術之士數千人作為內書二十一篇外書甚眾又有中篇八卷書言神仙黃白之術亦二十餘萬言中篇者劉向傳所謂鴻寶苑祕是也與外書今並亡內書則鴻烈是也藝文志謂之內篇是書有後漢時太尉祭酒許慎東郡濮陽令高誘二家之注隋唐目錄皆別傳行今校崇文舊

書與蜀川印本暨臣某家書凡七部並題曰淮南子二注相參不復可辨惟集賢本卷末有前賢題載云許標其首皆曰問詁鴻烈之下皆曰訓又分數篇為上下以此為異之鴻烈解經解經之下曰高氏注每篇之下皆曰訓又分數篇為上下以此為異崇文總目亦云如此又謂高氏注詳於許氏本書文句亦有小異然今此七本皆有高氏訓敘題卷仍各不同或於解經下云許慎記上或於問詁上云高氏或但云鴻烈解或不言高氏注或以人間篇為第七或以精神篇為第十八差參不齊非復昔時之體臣某據文推次頗見端緒高注篇名皆有故曰因以題篇之語其間寄字並載音讀許於篇下粗論大意卷內或有假借用字以周為舟以楯為循以而為如以恬為悵如此非一又其詳畧不同誠如總目之說互相考正去其重複共得高注十三篇許注十八篇又案高氏敘典農中郎將卞揖借八卷會揖喪遂亡後復補足今所闕八篇得非後補者失其定著外所闕卷但載淮南本書仍於篇下題曰注今亡許注仍不錄敘並以黃紙繕寫藏之館閣

小畜外集序

或謂言不若功功不若德是不然也夫見於行事之謂德推以及物之謂功二者立矣非言無以述之無述則後世不可見而君子之道幾乎熄矣是以紀事述志

必資乎言較於事為其貫一也自昔能言之類世不乏賢若乃德與功偕文備於道嘉謨讜論見信於時主遺風餘烈不泯於將來有若故翰林學士尚書刑部郎中贈禮部尚書鉅野王公者幾希矣公諱禹偁字元之生知好學九歲能詩與郡從事故相畢文簡公為唱酬之友及策名從事中書命趙韓王薦其文章太宗皇帝既已知名命召試中書宸筆賜題詔臣寮和御製雪詩序奏篇稱善自大理評事擢右拾遺直史館賜緋衣犀帶以寵異之端拱二年親試貢士俾公面賦長歌上覽而喜曰此不踰月當遍天下一日侍燕瓊林宣至膝前顧謂宰相曰王某一朝名士獨步當代異日垂名不朽矣公嘗謂遭知己之主非盡言無以報稱故自登文館至涉禁林知無不為入則以告兩朝獻替一節始終由聖君以忠亮待之士論以公卿屬之然而襟抱冲夷鋒氣邁高直躬行己不為時屈上知其然使宰執喻旨戒以容物而憤懣所激不能自己三坐左官皆以直道因作三黜賦以見志有不屈於道百謫何虧之句此其見於行事之深切者也雍熙中林寇內侵邊警未艾公援漢文君臣單于事勸上內修德而外任人若勞民以事邊則寇在內而不在外矣於時京畿旱亢奏省乘輿服御暨紫雲工巧之技第減百官月俸願以己先稍贖尸素之罪在章聖時應直言詔亦以通達好教繼遷為請復議減冗

兵并冗吏以寬租賦親大臣遠小臣以重國體艱難選舉以清士流澄汰僧尼以除民蠹增州郡武備以防窺竊推天官洪範以弭災變皆切於時宜有裨朝論未幾臨潢講和平夏封策息民罷兵省費除弊多公先識之所啟發此其推以及物之著明者也前後三直西掖一入翰林辭誥深純得裁成制置之體冊命莊重兼典謨訓誥之文端拱箴切劘上躬待漏記規警時宰上三賢疏推原前代之失不異方今請東封賦前知盛德之事必行聖代論議書叙理極精微詩歌贊頌義專比興雖在燕閒或罹憂患凡有論議未嘗空言此其紀事述志之尤最者也惟公道直行果既如彼主知人望又如此若天假之年久於是位則經國致君之業必大施於當時豈待言而後顯惜乎壽不及知命官止於省郎卒不得究其懷緼此所以發而為文章著見於後者也公之亡也天子嗟悼賻家恤後恩踰常比嗣子嘉言擢祥符進士上以詞臣之裔特遷大理評事以祿其親曾孫汾第皇祐甲科以免解法當降等仁宗閱卷首見公名嘉其有後特賜元第未幾考課上猶記前事命加秩一級今為朝議大夫集賢校理諸王府翊善茲以見文學行義足以垂裕後昆則夫臧孫不朽之言信於是矣公之藁晚年手自編綴集為三十卷命名小畜蓋取易之懿文德而欲己之集大成也後集詩三卷奏議集三卷承明集十

卷五代史闕文一卷並行於世而遺篇墜簡尚多散落集賢君購尋哀類又得詩賦碑誌論議表著凡二十卷目曰小畜外集因其名所以成先志也謂僕嘗學舊史前言往行多得其詳見諮序引久不獲辭竊謂文章末流由唐李涉五代氣格摧弱淪於鄙俚國初屢有作者留意變風而習尚難移未能復雅至公特起力振斯文根源於六經枝派於百氏斥浮偽去陳言作而述之一變於道後之秉筆之士學聖人之言由藩牆而踐突奧繫公為之司南也集賢君力學名家克大門閥振其絕業傳於無窮又足以繼紀事善述之美也不其韙歟

呂舍人文集序

仁宗皇帝一朝文章人物之盛跨越前代天聖初故相鄭國宋公洎仲氏尚書景文公同時擢甲科景祐中故叅知政事歐陽文忠公由銓選陟文館閱旬歲而歷兩禁登二府號令風采愜然動天下豪英間出相繼進用方是時承平百年禮樂興起亡書佚史靡不蒐輯鴻筆大手兢獻所長上之朝廷詔誥詞命與典謨相高下之臺閣論議章奏有忠嘉之美至於一篇一詠尺牘片札朝染翰墨夕遍家戶彬彬然文雅之風成於上而浹於下矣於時故兵部員外郎知制誥知潁州呂公縉叔起遠方邑尉入為編修唐書上方覽觀前王以季朝舊史叅錯不倫思欲刊

正為一代信書預筆削之任者皆一時高選而文忠景文二公實專典領積十七年而書成前後官屬更十餘人或徙或遷出處不常惟縉叔與尚書范公景仁內閣宋公次道自發凡訖於絕筆又集天下碑刻類為唐文傳信歷代氏譜族志為古今系表二書獨出縉叔一手可謂勤且博矣縉叔在朝最久雖兼領他司而未嘗離史事沈酣簡牘著尤多其或頌聖歌功賡唱迭和公卿倩代二府簡討涵濡應答殆無虛日及典誥命屬覃慶需恩文書沓委占吏起草不少稽停未幾議修仁宗英宗正史朝論莫先縉叔者乃以積廛致疾疲於鉛摘懇求閒職以就頤養朝廷惜其遠去詔以本職出守踰年終汝陰卒不得繼馬班之業述黃虞之典士大夫所以惋惜不已豈特歎周南之留滯也縉叔名夏卿生十歲知書日誦數千言疊紙援筆便成章句大門侍御公謂先德廣文先生曰此兒不假礱琢自成美器始冠游京師舉進士秋試不捷時我先人在朝得其試藁示同列曰安有文章如此而不為時用者及其去也以詩勉之慶歷初再舉鄉書貢籍皆在上選既而擢第調端州高要縣尉丁文簡公與景文公聯章薦入書府歷秘書著作丞直秘閣外臺郎修起居注遂知制誥嗚呼天不俾壽撤瑟之日年纔五十有五平生所負經濟之緼未得悉施於時獨有文字載之冊書播傳人口不朽之事其在茲

乎嗣子拯善守世學悉哀舊業以類詮次合為總集求予文以冠於篇予以縉叔
家則同里學則同術仕則同年入朝同踐書館聲氣相與蓋有年矣宿草之恨未
嘗忘之覽其遺編固多平日所見及嘗同議論者不待復熟而後見其所存也縉
叔少通經術長而刻志史學仕宦三紀始卒史官故其立言創意深微婉約不戾
經傳之旨詩則主於諷諭文則善於敘事贊頌本於導揚美實書奏謹於推明治
理大抵獨得胸襟自成機杼辭雖精奧而不取其僻理雖切著而不事抑揚嘉祐
上書謂天下之亂常生完然無事時救失在於及時宿衛雜出民間而侍護禁掖
宜取編戶倣古虎士衛士之制坐食營壘之兵本非土著難以應敵不若漸更復
府衛以重根本其愛君憂國之慮遠矣論史書謂陸羽秦系避潛藩辟命終躬不
仕宜列隱逸闔立本王璵由藝術躋取高位宜附方技其表善抑奸之意切矣文
宗紀及宗室宰相孝友藩鎮外夷逆臣諸傳十九贊序明識獨見勸懲之意深矣
劉知幾有云文之與史其流一焉觀縉叔所敘汪洋闡衍體制不一然博學多聞
拾遺補藝發幽隱甄是否使讀之者知善惡之所歸其三長之最歟凡卷第古律
詩十二雜文議論贊記八表書啟序三祭文碑誌行狀七制誥十總五十卷紹聖
元年二月十五日

蘇魏公文集卷六十六終

蘇魏公文集卷六十七

宋太子太保右僕射同中書門下平章事司空魏國公蘇頌撰

逢年

裔孫萬靈重刊

序

耀庭

送郭京評事序

康定二年春西寇犯渭城涇原守以聞天子閔然念邊民之數被其患思謀永逸之計乃更命近臣往督師律元戎偏帥奔走率職罔解其勤居無幾何又詔吳興守滕公為刑曹副郎直集賢書殿往鎮涇陽維是涇原諸軍皆隸焉滕公奉命馳至闕下進見之際荷聖主知遇之厚恩得奇瑋魁梧之人以助軍旅之畫乃言處士郭君於上曰斯人博學而多謀重義而輕利一舉進士不上第而退居九華蓋三十年遂亡仕進心若擢居戎幕必能出奇吐謀以贊帷幄之論上曰是嘗一二臣為吾言之者行用之矣即日制詔池陽郡守給裝錢起生傳赴京師至則特旨賜廷對口陳兵家成敗之策邊徼之利害攻戍之得失諸臣所未能言者悉為之對可不可皆合當世之務天子悅之乃以廷尉平命生往叅謀陝西軍事於是公

卿相贊於朝廷士相慶於閭巷以謂天子用處士矣自茲下情得以上通矣主恩得以下達矣草澤之賢者得以自進而議時政矣如此而不治者未之有也或有謂生曰天子所以擢滕公滕公所以薦先生於天子而幸用之而未聞先生所以論報主恩感遇知己之意先生曰吁是言也於我何有哉夫滕公自尚書散郎陞名曹直書殿職由刺中州而任方鎮要衝兵屯之地直匈奴之孔道國家倚之猶藩屏焉寵遷之若是豈天子私其人而授之耶蓋知其才之可任而效之有可責耳天子用公之言而吾自布衣召見不由覆試而授官蓋國家擇人而委任耳豈私於我一布衣哉彼既不以私而薦任豈可以私而言報耶雖然固當早夜思之籌慮幅億期績用之可成焉某時聞生之言而內喜且言曰是舉也可謂上下俱適其道耶誠使朝廷為官用人推擇信任皆若是之篤則何云上有曠官而下有遺才乎使當時公卿百吏修職奉上皆若滕公之感遇主知郭生之盡心公家則何云政事隳墜國聽壅塞耶上舉之若彼之得下行之如此之善予將見俾匈渠於藁街旋凱歌於京城休戈息兵拯人罷勞其斯舉矣不曰美哉生之行也士大夫多以言贈予獨并飲其所嘗道者以為其規

送施龍圖赴延安序

自陝以西釐其州郡為四道以建帥府而延安特據其要隘日者興師被邊又嘗
節制四府故其軍政雄重不與他鎮侔膺推轂之任者非有文武經緯之才莫得
以處之自夏人款歸兵實內郡是四帥者各治一道不復相權然延安之守猶重
於他鎮蓋其封境與番人交錯外距敵巢弗十數郵每羗人來請皆先出於是由
帥府覈其事之當否而拒納之方用兵時內謹戰備講肄師旅正合奇勝以誅弗
順勢甚易也今朝廷方以德綏諸夷不欲生事疆外羈縻之策專責方任急之則
託辭以生覺弛之則乘間以為患則夫措置威懷在祝其微一失所御姦萌滋啟
是安平之守不亦難於禦侮之將乎皇祐壬辰歲六月天子用前帥為樞貳扞城
之寄構於後選乃以內閣施公頌者更使三邊又嘗秉安化之鉞皆有能績聲重
關內俾蒞厥政僉曰宜之仍受榮戟往護諸將復增美秩以寵其行制下之日士
大夫咸以謂邊藩得人西顧益無虞矣先是朝廷進拜公卿歷選於眾多由閭閻
之任上意若曰疆隅既寧人復忘戰且慮夫左右之臣恬於文鋒而急於武律也
是以詳試其能必先觀以軍旅之事而後付之政柄欲其勞於外而不廢於內也
故公之是行雖抗章懇辭卒不獲請茲所以見朝廷之於公將有意大任乎惟公
莊重清方剛毅不撓其臨郡也寬簡而果於斷其刺部也精敏而濟以和觀是二

者可謂周通之賢矣夫以周通之賢加之已試之效握節大府坐制一方寓命以治軍師持重以綏獷敵所務遠畧不徼奇功守於平安在公不為艱矣一日上思舊勲使者持急宣召登公輔總眾職附四夷蓋練達已稔聲名暴聞不時日而功業成於時士大夫又可以慶廟堂之得人也

送楊該下第序

取士之柄不專於有司舊矣今天下之為士而進取者以萬計為有司者既不得素專其任而與察其能否也一旦當大比間則雜選羣至有司持尺度糊其名以較其一日之藝苟用其言合規矩無甚高論者謂之中程乃留以充選焉雖其素所弗能有司豈得而知之耶士或恃卓越之才不能委曲以盡一日之試小有疵累則以尺度去之是昔之所恃者有司亦不得而采之也夫有司所恃取士之柄不專若是將以罄天下之真儒實廉而舉之不亦戾乎雖然任其責者豈不欲進賢者而退不能者耶而所取者非必盡賢所去者非必盡不能何耶拘於尺度而不得素專其任以與察其能否之謂也夫璠璣瑩瑒世皆知其為難得之貨非砥石瓦礫比也及混而置之使皆能知其為寶者辨而異之則真偽幾判焉雖甚疵纒不足為累也異於是者必求其渾然無瑕慙乃以為真如此物之果真者鮮不

棄矣又不幸而以璠璆為瓦石者有之矣幸而以瓦石為璠璆者有之矣彼物之精瑩瑩然易別也而人之所取者猶若此之患況乎英豪所弛之士雜然並進有司不知其素之能否其所舉者特一日之藝又求其渾然無累則進退之間豈無幸不幸乎得明有司焉則於斯亦可幾夫不失人矣故今士之於進取也不以得失屬於有司蓋知其得失者係夫幸不幸若然可謂志於道而能自信乎吾友楊君唐彥豈非斯人之徒歟唐彥前此嘗舉進士於開封矣是歲四方之士畢集京師其多不與常比朝廷選擢有司尤艱其人今紫微吳公實任其柄焉而唐彥與丹陽邵興宗程文初中高第以疵累不合程式有司用制格不得留又懼後之弗知者以謂不盡才也於是首署二君名揭於道曰試考皆第一以聲病不預奏名方是時試於公所者幾數千人仰公之鑒裁若龜鑑焉以謂奏籍未上而是二者首彼優異雖名不在選中而衆皆以為必天下之士也其後興宗應詔科奉廷對又言邊兵得失擢居西州幕非所謂天下之士乎而唐彥再舉進士復不預名當時之知者往往為之傷惜以為有司之失人唐彥處此獨恬然無芥蒂之意復謂人曰我之不逮耶有司豈不明邪不然則吾時之未至也我將泛舟而東游於吳會以就閒燕而惇勵吾志操以俟吾時豈當戚戚於一得失哉士於是益知唐

彥為志於道而自信者也吳公昔為明有司而善鑒裁者也而方今取士之制拘以聲病非為能得人也後之為有司者不必為不失賢也

東山長老語錄序

宣城太守史館刁公景純始闢東山寶惠佛寺為禪居疏召海惠師居實以主之徇眾欲也師東陽右姓雙林淨徒少遊諸方遍叅知識最後得法於瑯琊惠覺禪師世所謂臨濟宗門而南院後裔者師其流也自涖叢林宣揚佛道一音既演四眾畢臻虛谷洪鐘有來斯應量根器之淺深隨機緣而引導晨咨夕叩虛往實歸如是累年大振宗旨雖道本無體非文字談說之可明而人亦有言故應對酬酢之不一於是有所升堂答問洎入郡揭榜等語錄三卷傳焉其說曰庶品萬形同出一姓無古今遠近之別無高下細大之殊達其指歸則六合內外不離乎方寸局於形器則一念起滅已隔於多生至人冥觀動與理會以為獨善不若利人以心傳心其來有自後之學者返本循元一悟真空無復餘事如深夜出曉迷途得歸非敢默默不傳此無量善知識所以祖述於玄綱而大資政南陽公所以不吝於言說也公以文章器業翊亮三朝入輔出藩自蜀移越每經綸制置之暇教條宣布之餘游心定慧之門得意言象之表於是禪流輻輳爭望門庭迅機電激動形

篇什其在劍南則有與峨眉中白洎郡僚府佐往復抑揚及拈提古語別為兩集其在鎮東則有與法雲重喜唱和雜述幕府記錄鏡於豐碑秀句英辭播在人口叢林駕說之盛不愧於昔賢宰官倡導之風復見於今日某忝鄰對境稔熟傳聞限有帶水之遙末由文席之侍蒙寄墨本實會初心未幾令姪先輩東來見過因語及此且曰嚮之兩集有蜀州吳醇史君秘閣文與可作序印行今茲唱和石刻之外復盈緗帙亦將鏤版見屬冠篇某游公之藩蓋有年矣聆師之譽固無間然不見異人既得書而啟發以為作者宜序事以著明大凡偈頌賡載總若干首其餘觀面高談隨機縱辯不立於文字者則不在焉昔莊生之得惠施喜有忘言之對謝安之與支遁將期塵外之狎賢德相值今古同風況公夙殖德基明見佛性入游戲三昧超圓頓一乘闢稽山之道場付慧照之適齋彼上人者難為酬對得大檀越共為證明異時揮塵之間皆契投針之妙人境不奪照用同時賓主歷然言語道斷非涉異境自是己家消搖以遊造次於是其於道也不亦廣矣其於言也豈可已乎門人某等以予於景純有心照世交之契於實師為道存目擊之知遠詣京師見求序述予以謂宣城山水之郡古今故實之傳賢守高人往往相值昔唐相裴休為廉察嘗致黃蘗運公於開元道場以談性理故有傳心法要休自

序之今景純作鎮又為實師崇建法席以唱宗風復有茲錄見屬鄙文子師心有年聞道來達披文游目茲見辯才之不窮覽今懷昔良嘉名德之相遇姑用讚歎思有激揚夫至理玄微見於言者已為粗迹一時對問序其事者豈盡端倪兩皆虛談斯亦奚用然而空有互見語嘿對持非因事而顯發孰見道之著明厠足致泉無用所以為用因蹄得兔忘言而後可言強為標題已慙聲綴默識之士願姑妄聽焉

趙大資與法雲長老唱和集序

見聞覺知出乎性哉而達識之士以之明本心動靜語默出乎情哉而知言之人以之觀要道自竺乾調御洎諸方導師接物應機當人答問標揭新理既有會元敷暢微辭遂成章句或一字至於七字以有言至於無言指事明心莫辯乎此故仲尼目擊於伯雪淨名杜口於文殊形雖淵渟聲已雷震給孤四句之偈等善法百千之妙頌理有未盡言豈憚繁大用現高蹈於佛祖孰能探頤於淵源三復牽珠粗見抽細所期真友知覺路之司南聊書卷端為寶月之標指云耳

明義大師集菩薩戒羯磨文序

繹經證義明義大師清行既修正觀行遂杜門蕭寺依古懺式建立道場晨夕加

持歷十餘年未嘗一日廢也薰修之外嘗閱藏典至菩薩戒案其科條疑有差舛
三復尋繹得其中文害於義者數事焉大槩以戒有大小乘之別而行持之人有
頓漸之異據其宗旨皆先佛所說不離於藏教也行法經云古文惟請五師而今
文所引普賢觀經啟請六師藏典不載瑜伽大論本無次序而今羯磨文依次受
戒又唱相結界有內外之限受戒和合失先後之旨是皆小乘下根之所持不可
與上幾解悟之人同日道也其所以混淆叅錯若是非作者本意由末學傳授引
據非當故失其歸趣耳行既依義刊削捨其細而從其大復集諸經律以訂正其
非謬將令學者開卷披文反本尋原悉見端緒譬夫觀水於海寧顧於蹄涔逢歲
有秋奚資於蟻粒宜乎大善知識留心而不已也一日持書相示見屬敘事予嘗
謂為佛者始於戒而成於慧戒者所以持己實萬行之本也蓋能持己者外物無
以撓其中而純明由是生焉然後遠覽廣照拔昏拯迷濟物而不倦此佛之序也
今行之精進如是吾知其非僻不可入於胃次也讀書求義而能正數百年之舛
訛非純明之效歟不獨明己又將利於人使修習之徒策入三聚棄凡趨聖共證
無生之理蓋迦文之所存也

蘇魏公文集卷六十七終

蘇魏公文集卷六十八

宋太子太保右僕射同中書門下平章事司空魏國公蘇頌撰

逢年

裔孫萬靈重栞

書

耀庭

與胡恢推官論南唐史書

某伏蒙寵示新著南唐史藁玩讀累日深服才致之敏雖未獲徧覽全帙然用數篇可以見作者之新意也觀其發凡起例所記該洽固非小見淺聞之所能造詣竊於其間有一二事可疑者敢輒條問不知足下以為如何也仲尼曰必也正名是古人凡有所為必當先正其名況在史志之作為後世信書豈不先務其名之正乎今足下題三主事跡曰南唐書某主載記者得非以李氏割據江表列於僞閩非有天下者故以載記代紀之名乎夫所謂紀者蓋摘其事之綱要而繫於歲月而屬於時君乃春秋編年之例也史遷始變編年為本紀秦莊襄王而上與項羽未嘗有天下而著於本紀班固而下其書或稱帝紀言帝所以異於諸侯也故非有天下者不得而列焉而范曄又有皇后紀以繼帝紀之末以是質之言紀者

不足以別正閏也或者謂陳壽三國志吳蜀不稱紀而著於傳是又非可為法者也壽以魏承漢統為正故稱紀吳蜀各據一方故在諸侯之列而言傳愚以謂既以魏為正統則諸侯宜奉天子之正朔其書當皆言魏志吳主蜀主傳安得言三國志而於吳蜀主傳各稱其紀年乎若曰吳蜀不稟魏正各擅制度則其書自稱紀無害史例也或者又謂仲尼作春秋不稱曰周史而曰魯史不稱天王之元年而稱魯公之元年則吳蜀傳不繫於魏史而自稱其年紀於義無異予曰仲尼所作者魯史爾故稱其國君之元猶書曰王正月言王者之正諸侯所當稟奉而行稱魯公之元者是別其一國之書也又若隋已受周禪最後代陳并其國地唐姚璿換陳書亦稱紀李延壽作南北史二國之君有閏有正亦各稱紀而古人未有非之者所謂載記者別載列國之事兼其國君臣而言有正史則可用為例故東觀記著公孫述等事迹謂之載記而晉書又有十六國載記蓋用其法也足下必以南唐為閏位自當著五代書後列云李某載記可矣今日南唐書載記似非所安也又有國家設官分職因革不同五帝之前有雲紀鳥紀之類商周而後名稱益廣尚書之周官周禮之三百六十官左氏記郊子之言之詳矣班固始作百官公卿表歷代各有職官志皆所以見異代更改沿襲之源流來者安得易而同

之乎今足下書有兼納言視秩三司之類且李氏稱僭不聞有是官是非足下以兼侍中與儀同三司為近俗而易以此語乎是不然也若官稱之可易則仲尼序書當一概以唐虞之官目之矣而旅葵曰太保作旅葵蔡仲之命曰周公位冢宰君牙曰君牙為大司徒罔命曰伯罔為太僕正者盡取當時之官名以記其行事也左邱明作傳列國之官稱亦未有更之者如楚之令尹宋之司城晉之三軍大夫如此之比非可悉數足以為後世約史之法也又詔令者古左史所記王者之言發而為號令其美惡繫時之治亂使後世有所觀法焉今足下所載李氏詔令皆非當時之言並出於足下藻潤之辭美則美矣其可為史法乎夫載言之美莫過尚書虞夏之際其辭約而典商周之後其辭華而悉必若王言之可改則仲尼刪書當使誥誓之文與典謨一體其所以存而不易者欲見異代文章之盛也故楊子得以稱之曰虞夏之書渾渾爾商書灑灑爾周書噩噩爾自漢而下左右史為一職載述者兼言與事而書之而太史公班固諸史所記制詔文體類皆不同盡當時之言也蓋下筆擇其善者則備載之其不足存者則畧其意而書之若以李氏草創典章不備文獻不足則其命令之文亦可記其大指而已不必釐改其辭也某學無師法未嘗為史但叅之以經訓練之以前書所見如是非敢以為得

也蒙足下不相外乃敢發其所疑者亦幾乎因事述意求益於識者耳可采可擯毋惜開諭

代提刑王綽上宰相

朝廷不用武幾四十年一旦西羌負固從中命將率師致討間者帥臣數不料敵強鄰伺間敢窺邊郡我師至於挫銳雖謀臣議士交陳攻取之計而曠日持久未聞決勝之畫夫以朝廷之威天下之大兵革非不堅也軍旅非不眾也將帥非不擇也然以守則不固以戰則不克其故何哉得非以承平日久兵頓卒罷邊遠既聞未遑講閱而使之禦戎對敵非百勝百全之道也故逆豎跳踉得以假息而又萑蒲雜黨乘隙而起嘯聚數效為鄉民患亦既翦治除滅俘捷繼至尚以道路遮逆桴鼓未息勵兵訓卒大為之防郡國武備不為不舉矣其於師律禁令之間猶或未行故某得以摺撫餘論而詳言之伏見去歲倫賊狂蹶尋即成禽其所經州縣巡檢使臣縣尉以選愞黜去者凡數十人相次詔書選除新吏大抵人自激昂監觀前覆期立來効懲一勸百此為信然某竊體當諸處兵士以久不練習戎戰類多罷軟驕惰之輩近來雖有訓練之程而未聞習服之效伍符尺籍之禁既約束之不行鼓旗耳目之令亦進退之亡節若即加督責稍或勞苦往往羣輩相語

構誹辭出怨言以動搖眾心前日偷寇之患是也其統領官屬以此多卹物議專務姑息故其驕惰之性迄未悛革驅而進戰至有臨敵而解鑿中軍金鼓之指若斯之比皆和輯不至約束不嚴之過也兵法曰卒不可用是以其將予敵也又曰卒不習勤百以當一習而用之一以當百是以古之善用兵者於平居無事之日先示之以恩信威令士已親附畏稟然後交兵合刃之際行令立法人服而眾信我之所指必從而死我之所麾必從而移戰攻必取此其道焉凡今之為將帥者既不得素拊循其士卒而又統領之間禁令不專勢不能盡其死力姑藉朝廷厚賞以懷之每一經戰地小有俘獲皆厚賜給若從而敗散朝廷既行責帥之罰其卒伍或不問罪至如往歲關外之戰屢失將臣前年京東西羣寇亦曾殺陷使臣縣尉初亦下令捕戮既而虞其竄伏為患遂命招集一切原有止於配移下軍耳自此戰士見上令寬大但有邀賞之心而亡用命之志孫武有言令之以文齊之以武是謂必取又曰愛之而不能使厚之而不能令亂而不能治譬若驕子不能用也某以謂國家刑賞之柄律令具載夫敗軍者抵罪失利者免官將帥之刑也臨敵而先退背軍而走失主將亡鼓旗節鉞者皆斬此部曲之刑也近者邊疆將臣已得專行師律若巡檢縣尉不可便令執誅賞之政其所統之眾亦在朝廷為

立條禁申嚴號令必使畏威稟命而後趣其進戰責其成功可也某之愚慮欲乞朝廷降指揮舉行軍法應令後巡檢縣尉遇賊出戰之時其弓士弓手若有不稟號令及臨陣退走因而亡陷將領者並當以軍法從事仍遍告州縣使衆共知有此條約則統御之際可齊其士心然予奪之間亦繫乎朝旨行師之衆此為先急閣下盍因論道之隙一為開陳使愚慮得行則軍旅之下皆知典憲接戰之時不復敢有逗撓戢兵禁暴此亦一端願賜詳擇某資材不厚委寄甚隆朝夕省思嘗懼職業不修上累吾君吾相之責任苟有所聞豈得緘默伏惟閣下富彌綸之才處機衡之任巨賢當國四海嚮風誠願采擇狂愚納用策慮則折衝厭難勝於未形彼羗戎豪酋將請命之不暇尚何有侵軼之為虞乎事實言直洩瀆鈞聽某無任悚懼激切之至

謝太傅杜相公

某之從事於南都也伏值相公以功成引年退居民里朝廷之優寵天下之瞻仰茲固崇絕於一時而士大夫望其藩牆希一顧之過者豈容易者眇爾小子幸得效官府不時隨衆僚進見風采奉承餘論不見疏棄已為榮矣一日相公呼坐與語因論文字且索鄙作乃蒙以文學見稱他日又承誨曰吾常見世之學文者為

吏而或不事事言吏政者又有脫畧細故而不為文頓聞吾子之當官嚴上恭下不失中道辨論公文不憚勞力能爾可謂善政事矣某既承是言竊退而念之夫相公之所謂文學者經綸王道表裏聖賢言辭可以繼典墳之美論議可以明當世之務是豈章句之言誦數之說足稱於其前乎相公所謂政事者綱紀朝章措置邦體發一言則號令於天下舉一事則惠澤於生民是豈規規然謹詔條奉長上者足語於前乎然今猥見稱道者此特大賢君子好善忘勢不以己之才高道尊而忽人之小善小能故及於斯言而某亦未敢私之以為恩也如是益久而相公獎進之意益加於前或贊之於當途或譽之於仕進作為文章乃使之評視奏疏章草又使之執筆間旬月不及門則恨相見之疏隔每見之必推古人之所為相期於久遠矧矧乎其言之彌勤愉愉乎其意之彌親某於是又自念曰夫以相公之道德名位豈有待於一後進生而過相稱譽哉然而垂意若是者是必其中有所取而云爾也顧某之所有何足副其所稱邪雖然不得不謂之知己者也某嘗謂知人聖哲以為難嚮非視其行藝之可嘉而察其操履之能固彼大賢君子孰肯徒然許之於心而譽之於口也然其所以受知於人也者亦不得為易何哉士嘗患無知己既有知己矣則於其稱道也且厚而其責望也亦深彼以文學見

知也後將責以文學之用於時矣一不至焉足為知己者累也彼以政事見知也後將責以政事之效於時矣一不至焉足為知己者累也得不得審己之道與彼言之相當然後可以無慊自視或餒焉當彼之厚望而貿然無媿者彼將以何人見待乎某是以每一承相公之言未嘗不退而自省所趨嚮與所作為懼有不至必將以聖人之法言為規準勉勉焉以不戾於道為至也如是者非唯力儒行己其義當爾亦將求免為無聞之人庶幾不負知己者之責望也近者官滿獲代迫於從調不得留侍杖履違去門下忽復一月言念恩紀無有涯量中心之懇固非筆墨所能究悉然而相公之期某也甚遠而某之思報德門下寧當如常人之用心故於書尺之間不復以屑屑小禮為務今偶使人行敢布腹心之萬一庶乎相公察某感知己之心不為淺也依戀門館下情無任

上中丞諫議

某向以備幕府之僚吏司縣邑之政令伏江干而望門庭者凡幾年矣私自為計進不能奮起卓絕之技以收顯名退不能累異績立奇效以躋榮仕徒取絕於知己之門以不得見役為恨近者將外臺之命獲至於都門夤緣素舊始一拜堂下未逮從容而迫於簡書不得再見風采少敘懇懇中心尚有所願達者蓄之滋久

將默而不陳是重恐懼而忘厚德也將輸而布之是率爾而瀆於尊嚴也與其默而有亡德之罪孰若輸而受瀆尊之誚與其退而有自絕之悔孰若進而就妄言之責執事其亦察而憐之使得悉其愚慮幸甚某竊念昔之未仕也家府與執事有同朝之好故某得日趨侍於前居則聆執事之法言行則觀執事之儀範如是者累年矣執事矜其所為不見謂不可及其舉於有司也其子奪柄則執事操之程其言不以役於眾是執事之於某也愛亦至矣恩亦厚矣某固已銘之中心誓之旦暮期於後日有以報見異之重矣今者道路趨走進退皇皇然而無所適愼默而歸其舊局事卑冗之役趣期會之務其所以戚戚焉者非敢憚煩辭賤而云然也且金陵大邦江寧為劇邑以某臨之實非其任雖然亦未嘗以不肖而不盡其心為之謹疆場之政則明其比詳簡其迨胥為之辨閭里之訟則拔其豪猾安其罷軟除敝起廢足以紓吐籍之艱懲煩禁慝足以清貪暴之源有所不及未嘗捨也揣分摩己豈當過有所求今猶有所未釋者蓋夙昔之願未遂為慙耳念某生而承父師之訓以簡編自娛故嘗得幸於選擢力有所困終委下流至於今無以自奮束於簿書窘於刀筆不得卒素業成美名上累明哲之知為恨已甚矣以是鬱鬱而不能止也非憚煩辭賤而云然也其欲摯諸卿以求息肩之便邪惟是

筋力之疲曾未暇伺候進退尚安能飭語言以附會志意乘人顏色以求賞愛哉其欲靜而須命耶則其蓄藏之未大名譽之未光恐遂汨沒於泥塗而不能成就其志願怵惕永慮未知所安非持而叩執事者殆無以起之何也執事以文雅偉量服海內以謹言碩德輔天子稱一人天下莫不以為當達一善天下莫不以為然至於樂育英才教誨不倦固常以此任矣某故曰自非持而叩於執事則無以起之若某之所為執事既已發而始之矣僕幸而終其賜不屑教誨開導誘進使得獲就藝業則某雖不佞猶能竭夙昔之愚志勉前脩之徽猷毋以固陋自棄毋以卑賤自放不為詭激之行以希當世之名不踐苟容之利以違一切之難讀書為文期適於中道而後已斯某之所以自為也願持其所自為勉而徇其所見取則又以為非獨亡悔而已亦將庶幾晞大明之末光煦江海之餘潤繇此而始矣不知執事所以處之者將如何耳仰干台嚴卑情無任

上時相

八月日承奉郎守大理寺丞蘇某惶恐百拜頓首上書摯文於昭文相公閣下某竊聞天下安注意於相天下危注意於將天子之事也遂萬物之宜使卿大夫各得任其職宰相之事也天子任宰相宰相治百官上下交相得然後百官熙而萬

事理古所以臻夫至治之極者以此其原歟方今天下治定王澤流洽聖主淵嘿於巖廊之上萬微之政仰成於丞輔以相公富經邦緯俗之才世載勲烈為士民之所瞻仰爰立作相俾乂本朝紀年之間三東大政再冠鈞軸此誠天下安而天子注意之時也自朝廷之百官下逮於州邑邊圉之吏量能隨器皆得其用居臺閣者謀謨於內分職守者幹裕於外事之細大靡有遺諳此誠賢相在位而卿大夫得任其職之效於斯之時天下之士負道藝者思發其志業以效於治懷勇略者願竭其智力而施於用羣輩率顛雜選而前以晞光榮蓋無虛日矧若某者有志於斯道為日久矣然而以材質駑下不能自奮以趨時汨沒下吏速十餘年惟其榮進之階非跂望之可及也嚮者朝廷用禁林之奏以先君子嘗繇文章顯於時謂小子某能克其家而世於學故委之有司俾覆實以視其能否某重惟朝廷進人之路莫尚於文學之選其所以甄待之異者非特貴其藝能而已必也觀乎趨於道非特取其言詞而已必也要其有所用顧某之樸學鄙文誠無以稱明詔既采之實因念昔者承父師之訓以謂文以表其志學者先所行苟遭時遇知奮發蘊慮見於事業不為難耳幸今朝廷推恩記其姓名嚮不能策厲以成雅志斯亦為學者之所恥也茲者獲罷外官聽命闕下伏遇相公當國任政方且慎擇人

魚...文集 卷之十
才責成眾職而某之所學專在文字輒敢哀采舊著離為五軸恭贊庭下無累之作固不足以紆台衡之鑒抑用古之將意見誠之義以章乎物也伏惟幾務之暇少賜屬目或謂其志意之有守而憐其為先大夫之後而未有成特均化工振起滯跡銷非璞使成器育陵莪為良材則某雖甚愚豈忘樹立儻其展四體之效以立於軍師使百姓加勇焉此誠非所長也若其相公以治平之旦務在奉行故事發揮典章俾之紬次前聞論議當世雖曰未學尚可勉而任職載述聖主賢相之功德使與謨訓均美此其志也干冒鈞聽

代人上樞密龐太尉

某聞崔祐甫之相唐也在位方逾歲而除吏幾八百員其間多舉朋親識故人當時蹇滯進擢畧盡德宗初亦以為言且問其故祐甫對以為薦延士類須諳其行實非涉曩舊何緣而知其能否仲尼云舉爾所知正謂是爾以茲眾論伏其知言天下稱為賢相書美竹帛光華至今何其盛也某發卷至於此未嘗不重複歎詠想見其風采耳念生不逢若斯人之推拔使沉滯之跡何階之望進豈賦命奇蹇之使然邪抑遭賢遇知自有其時乎某持是說久之未有際遇今將直貢於左右不知太尉以為何如哉竊念某才質駑下於時無所用偶以薄技得綴仕版故自

策名於茲且二紀矣三從事於州幕始脫銓選再效役於嶺江乃得近官碌碌常調以至於衰暮未嘗有知己特達之薦仕宦若此非所謂賦命之奇蹇歟雖然猶未甘心於廢棄者誠念頃游名場即獲拜接太尉之後塵爾來出入京師嘗蒙以一面之舊未之間擯今者幸遇太尉奮臯憂事業佐佑唐虞之君得時行道天下蒙福士之干時希進者多見稱錄於顯塗門下之士獨不可納說而望知乎且三府之上公位至重也五品之散郎官至卑也以至卑之官望至重之位其勢豈特霄壤相遠之限也其應豈特門庭萬里之遠也果以英哲之懷不替一日之雅俯聽愚陋容而納之則困躓之人未必無升進之望也以斯言之信乎遭遇之有時爾夫楚郊之踦履名微而數賤蓋可棄之物也然而昭王還顧而取之者得非以昔與之俱出而不忍以敝故而忘之也今某最陋無取然游太尉之門實可謂有年矣太尉果以疇昔之故記其姓名以備役使某誠未敢覲在崔公除吏八百人之中竊將自比楚昭之墜履尚希收采使預平時一物之數獲在左右不勝懇懇之至冒黷嚴鈞謹斥惟命

與劉原父

某白劉君十兄足下曩者竊不自謂得參文翰之游內省夤緣固為厚遇而足下

不謂愚陋無識首蒙相示唱和詩一卷并賢弟所著漢官儀一編俾得榮觀時僕竊私歎劉氏有賢明兄弟如此而吾幸辱從游苟不能孜孜磨勵以及百分是亦交游之深恥也他日又蒙出新文一通周還伏讀未盡通曉大率皆明理亂根本之所由辭高而旨遠深得古文之遺風伸辯一篇終始理道有以知足下之識通古今其言辭之美亦不下司馬子長之敘事設使足下生當其時彼辯說之士豈得馳其詭詐哉先德三銘足見孝子善述人之事垂之不朽在斯文也解木偶語其義切於譏誠昔春秋成而亂臣賊子懼今足下此文苟流行於世則竊位尸祿者得無悚勸乎穀熟橋銘言畧而事詳蓋出於符命之體而理或過之遠矣彼司馬相如班固輩紀封禪之事不過藻飭詞采贊揚君美而已今足下所作皆彷彿誥誓之義而成文上可以形容盛德下可以申勸將來豈徒與馬班爭能哉僕藝能淺薄不足稱道然自得友於足下始知學道之階漸及見足下之文又識為文之大體且世之為文者甚衆率皆好丹非素誇競一時苟求其繇理道者十無一二焉又求其醇而不疵者百無一二焉足下所為之文皆依約六經之旨而為之辭縱橫虛誕之說無得而入焉故讀之者知聖人之道尊而易行信足下之深於文者也其文前日值他客在坐不得詳覽無居何家公移治省局迫於改館日以

忽遽尋又以尊公有荆北之命恐足下趣裝無暇終未得再見前所相示之文今輒欲鈔寫一本以為中筭之祕儻一賜借惠庶孤陋之學有所模範則為幸之甚莫出於是惟足下終始之也又承見索寵行詩雖作之已久自以學不經師匠不足污大賢君子之耳目故但欲藏密而已又竊惟念沐足下獎進之益勤至如古之朋友相成之義則又有大於是者蓋始則以文章論議開導其志意終則以德行道義成就其器業故其所樹立必有可觀焉異日與足下翱翔盛世勉效聖賢之餘風而不中道畫乃所望於足下者也

同安裔孫萬靈錫經

逢年舜明

晉爵耀庭

允恭子敬全校字

蘇魏公文集卷六十九

宋太子太保右僕射同中書門下平章事司空魏國公蘇頌撰

逢年舜畊

裔孫萬靈錫經重稜

劄子

晉爵耀庭

辭免知河陽府

臣今月二十一日準閣門告報奉勅差臣知河陽軍府事臣稟賦拙艱自取罪戾聖恩寬宥復委要藩殫竭愚駑無以報塞伏念臣先臣翰林侍讀學士某慶曆中曾知河陽在任亡歿臣今被命復忝臨州得繼世官雖為榮幸追念往昔實不遑安欲望聖慈特許別換近南一州所冀少安愚分臣惟以軀命上答生成

辭免侍讀

臣準閣門告報伏蒙聖慈除臣兼侍讀聞命彷徨不知所措伏念臣齒髮衰瘁學殖荒蕪方且充位省曹典領眾職常懼不暨朝廷更令參侍經幄進讀羣書實恐寡聞難備顧問伏況皇帝陛下誠性天至登延俊哲敢期衰朽預在選論不待人言自知非稱伏望聖慈持矜至懇追寢異恩庶使賤愚免貽罪戾干冒天聽

辭免承旨

臣今月三十日準閣門告報伏蒙聖慈特授臣翰林學士承旨知制誥者聞命震驚不知所措竊以學士之職朝選甚高非惟取文章翰墨之工蓋亦有應對顧問之責而况專承密命首冠近班寵待固異於常員事任尤艱於虛授伏念臣短才極陋樸學甚迂遭遇四朝獎拔之私叨塵六職銓衡之任歲月逾邁齒髮已衰居常閱簿領之書猶有不逮將使司典冊之任實謂非常自省甚明實難堪處伏望皇帝陛下太皇太后陛下如天養物以器使人閔察丹誠許還成命庶安駑蹇之分不孤覆燾之恩臣無任祈天俟命激切屏營之至所有告命未敢祇受

辭免左丞

臣今月初八日準閣門告報已降告命特授臣守尚書左丞者聞命惴恐如踏水淵揣分揆能誠非所據竊以出納王命本自天臺紀正紀綱必由丞轄內則預聞於朝政外則振舉於條章事任非輕簡注尤慎伏念臣孤學無知自知甚明本惟議郎博士之才非有納言鳴玉之望遭遇聖世仕階顯途洎登翰墨之私浸迫桑榆之景在禮固宜於謝事荷恩猶許於備官已積厚顏敢希妄進豈謂伏蒙皇帝陛下眷求宿舊收擢滯遺遂致辱庸誤膺獎拔豈惟朽質負才不勝任之譏抑慮

近司有官非其人之累實係事體須控懇誠伏望聖慈垂亮丹愚收還前詔改授俊傑俾乂政樞庶幾衰遲獲安分守所有告命不敢祇受

又

臣今月十日伏蒙聖慈特差中使齎降詔書一道以臣辭免尚書左丞新命未賜俞允者恩出非次靡許避辭理有未安固憚僭瀆伏念臣福基甚薄識致無奇遭時竊祿以尤多忤歲愒日而已耄在朝無毫髮之補臨事苦筋力之衰使之恪守一官尚虞墮敗若乃擢在四府益懼顛危況越等夷實踰儀典輒殫愚志上訴天聰伏望皇帝陛下慎重名器之頒審察才愚之分閔憐不逮已合退藏追寢誤恩別除閒職誓勤晚節永戴生成

辭免立班

臣昨蒙聖恩除授守尚書左丞續準閣門告報奉聖旨令臣立班在韓忠彥之上臣竊見近例同知樞密院與尚書左右丞以除授先後為立班之序臣叨蒙進擢已荷聖眷至於叙位躋次恩禮尤異在臣愚分實不遑安欲望聖慈許依近例令臣立班在韓忠彥之下

辭免右僕射

臣伏覩制命授臣左光祿大夫守尚書右僕射兼中書侍郎聞命震驚不遑寧處
伏以宰輔之任海寓所瞻職贊萬幾位崇三事內附百姓外鎮四夷同王體則況
之心膂股肱論材品則比之棟梁柱石用人當否係國重輕伏念臣固陋之姿樸
野之學詳試已久績効無聞向者太皇太后皇帝陛下拔自天官寘之詞禁未踰
期月擢列近司總轄省綱預聞朝政謀謨寡效誅譴是虞敢料聖知更加褒進陞
揆路儀形之地兼西臺基命之司禮秩並崇責任深重伏臣才非穎特年已耄
荒處於承助之間尚多曠事據乎端台之要益懼疾顛願寢異恩俾安愚分所有
除命伏望聖慈特賜追寢

待罪

臣伏覩內降侍御史楊畏彈奏昨差賈易知蘇州留滯詔命二十餘日謂臣獨主
其事乞施行者臣才識愚闇久滯近司論議疏違致有臺劾案其罪戾宜即嚴誅
夙夜戰兢不遑寧處臣已請朝假見歸私家待罪伏望聖慈早賜施行

又

臣近以侍御史楊畏彈奏差賈易知蘇州留滯詔命私家待罪伏蒙聖慈特賜詔
書所請宜不允者聞命震惕愈不遑安伏念臣識性至愚迂闊於事預聞幾政忽

涉三期以樗散之材荷棟隆之任常懼曠職上累清朝昨議差除初謂奉行於故
事未及奏覆遂致稽留於詔書果取人言盍從吏議雖聖恩天覆察其本欲盡公
而輿論波騰乃謂專任獨見愆尤至此典憲寧逃伏望太皇太后陛下皇帝陛下
案用臺章早賜黜責庶幾修明法令有罪必行警肅周行不才知懼

又

臣近以侍御史楊畏彈奏差除賈易知蘇州留滯詔命事再具劄子奏乞早賜黜
責伏蒙聖慈特賜詔書所請宜不允者聖恩深厚仰戴曷勝孤迹兢危彷徨靡所
竊以宰輔大任表率百官人望所歸則議論行而必信物情不與則名器輕而易
搖而臣猥以樸愚誤蒙任使上不能謨明國體以熙庶工下不能甄別人材以協
衆望誤朝有違擢髮寧窮致招人言上躋天聽名一註於白簡罪當實於丹書雖
二聖覆之如天未令投跡於四裔而羣臣謂其失職豈宜包羞於近班是以屢貢
封章冒塵疏纒再紆中札曲論宸衷捧詔驚惶重自思省本欲更祈歸老屬茲方
負於罪辜倘布懇誠懼為僭越在臣進退之分敢計重輕於國廢置之間實關勸
沮伏望太皇太后陛下皇帝陛下於憐甚懇本無佻賜案舉嚴科亟行幽黜一則
安全於介拙尚保餘生一則厭息於煩言遂清朝路

辭免觀文殿大學士集禧觀使

臣今月初九日準閣門差人賜到官誥伏蒙聖恩特授依前左光祿大夫充觀文殿大學士集禧觀使者方俟謹投遽聞寵命跼天躋地莫敢違寧臣伏以仁宗皇帝置大學士寵待師儒之官真宗皇帝建宮觀使非見執政未嘗兼領近年雖有除授前宰執之例皆時望宿德然後授之而臣輔政無狀坐致臺劾聖恩寬大未忍加誅許其善罷已為微幸而又授以美職處之宴閒雖天地生成之恩何以過此然念臣早以疲憊屢控懇誠乞還印章願歸田里久未獲請深愧強顏反因赦過之私並有非常之命懼玷名器不厭人言伏望太皇太后陛下皇帝陛下矜憐轅惠收還新命許遂前請得養餘齡所有告命已牒閣門未敢祇受伏乞聖慈特賜俞允

又

臣今月十三日伏蒙聖慈以臣近上劄子辭免新除觀文殿大學士集禧觀使恩命特降詔書不允者仁聖保全非不知幸禮秩優異懼弗克堪伏念臣德薄位高犬馬齒耄日積悔吝辜負厚恩自為吏部尚書後來累曾引年謝事比期便獲歸休敢謂二聖誤知擢預政事纔踰再歲進位宰司雖木石疎頑豈不知報德之所

倘可自效不憚捐軀然以竊位偷安實愧公議受祿過量必有後灾故於春初再
露前請重煩睿聖惇諭再三臣內感眷知猶思強勉不敢固守一介之節以勇退
為高方積冰淵之危果貽負乘之誚遽速罪戾招致人言謂當必真典刑豈敢復
求安便今者伏蒙太皇太后陛下皇帝陛下察見孤直本無他腸寵以職名使同
善罷則臣之素願尚可重陳伏望聖慈矜臣懇誠追寢新命許令休退庶可以上
全朝廷之大體曲盡寬恩下遂孤愚之初心竟偕佚老再瀆宸聽伏俟嚴誅

又

臣近再具劄子乞追寢新命許令退休伏蒙聖慈再降詔書不允者露章重疊蓋
出憂危被命優隆益深罪戾尚有懇誠之未盡敢殫底裏以上陳屢瀆天聰難逃
國憲伏念臣顛愚一介遭遇四朝仕宦凡五十餘年實懷止足荷恩非一二可紀
未報毫分福過灾生老至耄及累祈休退已踰越於禮經尚此磐桓果招來於物
論自惟踈拙幾至顛隳荷聖造之曲全解政司之重務良懼所蒙之厚固多微幸
之漸倘不踐於前言是自隳於素守重念臣稟賦至薄年病交侵冬春以來內感
寒壅之疾朝謁之際常恐遲慢之愆近又失於養調發則幾於委頓雖欲貪冒於
崇秩豈不取誚於眾觀況臣本是書生粗聞義訓若材力猶堪於任使願重祿而

敢辭既精神已迫於耗昏雖聞官而莫稱義之所激處亦難安伏望太皇太后陛下皇帝陛下推天地生成之私察臣鄰誠懇之意閔憐孤特曲賜允俞許上印章俾還閭里遂克完於晚節得涵泳於太平不殞天年莫非帝力

或恐謂故事以宰臣致政恩禮優異不當自請緣臣已蒙制命罷政事自與見任不同臣乃再三冒伏乞聖慈特賜矜察

乞依例赴朝朔望

臣伏奉今月二十一日詔書以臣三上劄子乞追寢新命許上印章俾還閭里所請宜不允仍除大朝會外特免朝會者禮恩優異非昧陋下臣所宜當受然以累辭朝命屢承詔旨不敢再有陳乞已準閣門賜到官誥即時祇受訖見擇日入謝次伏念臣誤蒙任使久積愆尤以老疾獲解近司荷聖眷尚慶重職雖膺理寒瘼未遂痊平然拜跪伏興尚能勉強居在城闕坐廢朝趨不惟偃仰棲遲自招物議兼恐宴安酖毒必致天殃進退彷徨莫敢違處其免朝會指揮欲望聖慈特賜寢罷所冀少安愚分不至顛危干冒天威不勝戰慄取進止

臣伏見前馮京任宮使之初猶朝朔望今臣便蒙優禮深不違安伏乞聖察

辭免知揚州

臣準閣門告報已降勅命差臣知揚州軍州事者聞命震驚不知所圖伏念臣齒髮衰殘智慮昏耗久玷近序深負厚顏是以累上封章願歸田里天衷涵育未賜允俞夙夜彷徨方懼罪戾忽蒙聖眷授以要藩雖朝廷進退近臣務全事體而老臣惕惋晚景常恐顛隳豈可更冒寵榮不知足力所不遑義實難安伏望聖慈察臣款誠本蘄閒退收還新命特賜哀矜聽用累章許令致仕保養餘息實自生成退處衡門敢忘報稱所有勅命已牒閣門未敢祇受

又

聖恩深厚眷禮敦隆臣雖至愚實知優異便合奔走承命信次之官緣臣本以暮年懇求致政豈期異渥更授要藩不惟朽瘁之餘難當寄任兼於進退之際殊失廉隅反復省思未知所措是以不避僭瀆重布悃誠伏望聖慈特賜矜察閱臣齒髮衰邁疾病浸淫若或更冒寵光苟貪祿仕爵非德報諒譏議之難逃福過灾生懼死亡之無日仰冀聽卑之造俛推從欲之仁霈發德音許遂前請倘未填於溝壑敢忘惠於乾坤夙夜彷徨恭俟諭旨

又

屢奉德音伏深戰慄情有未盡義難自安仰瀆遠旒甘從顯黜竊以東南都會揚

為巨藩平時長臨猶藉重望豈茲老朽宜竊麾符況臣占數潤州境候相接糺恤親屬展省松楸在臣之私至為榮幸但以遲暮之景精力已衰當此要衝恐不勝任是以內懷止足外懼傾危冒詬控誠俟命累日彷徨顧慮愧惕兼深伏望聖慈察其懇款曲推洪造特賜允俞俾遂退閒免貶譏議稍還晚節上報天恩

乞致仕

臣近以衰病告老累上封章伏蒙聖慈再降批答未賜允俞仍斷來章進退彷徨不知所措伏念臣生質甚陋才不逾人仕宦四朝竊祿五紀年加耆艾而無經緯本末之能位在公台而有棲遲偃仰之請固宜引分難久冒榮加以自冬涉春寒壅遘屬晨夕趨務咳涕弗禁每侍殿墀常虞委頓頗墮儀範深積慙尤雖一聖包荒務全大體而萬幾有責豈可曠官是以屢控危棕上千宸聽再還印紱退處田廬待命累晨稽誅有日矧今朝廷貴德俊傑在官去惑治煩固多善類守文應變尤藉通才豈茲羸老之軀猶妨賢者之路伏望陛下矜臣不逮察臣無它廣天地生成之恩任鳶飛魚躍之性許行前奏使遂私誠如此則得請以還餘息皆由於上賜沒齒之後營魂猶荷於洪私迫切之誠殫竭於是取進止

又

臣近以老疾累上封章乞守本官致仕伏奉三月二十六日詔書所乞宜不允仍
斷來章臣拜捧之際荷戴天恩貪戀聖辰不敢再有陳請姑欲勉強在官更俟年
歲懇祈休老不意旬月以來故疾頻發胃脘咳頻腰足拘攣步履艱難膚革癯瘠
閱視簿領不能勝任接對吏民益自羞愧實緣衰暮每懷日昃何久之嗟稽諸訓
言亦有夜行不休之誡以此憂懼益不遑安重念臣今年七十六歲仕官五十四
年歷仕四朝遭逢五聖積日累久遂致公台復忝通班出守藩郡冒榮戶祿又已
逾年陛下寵待舊臣天覆地載不忍遽見棄遺恩禮稠重可謂至矣臣愚叨竊可
謂極矣所恨疲頓不堪驅策若更因循自取殆辱非惟上負眷寵曉夕靡寧將恐
遂至膏肓漏刻難保是敢罄殫危迫之懇仰冀高明之聽倘上蒙矜憫賜以餘齡
雖退處草茅敢忘報效伏望特降聖旨檢會臣前後奏章許守本官致仕臣無任祈
天俟命激切屏營之至取進止

臣實為日近故疾頓有發動雖上體眷懷強親職事然筋力有所不逮常恐顛
仆玷辱近班伏望聖慈特賜矜閔許令致仕倘得退就田里輔養衰疾稍獲安
痊則朽質餘齡皆出陛下生成之造臣無任迫切之至

又

臣近者累上封章乞守本官致仕伏蒙聖恩豐賜詔書不允所請仍斷來章臣具
劄子再控懇誠至今未奉朝旨伏念臣齒髮衰耗疾病沉綿雖祇奉德音免親職
事然而精神終是昏短筋力愈加疲羸日對史民嘗虞顛仆非惟自取譏議抑恐
上汙朝班伏望聖慈矜憐特降指揮檢會前奏早賜施行所冀退就邱園稍獲安
養保全終始實荷天恩臣無任旦夕彷徨俟命激切之至伏取進止

青詞

為河南郡君陳夫人服藥設醮

伏以羣生稟賦莫非造化之陶蒸萬事推遷蓋有灾祥之倚伏惟大道默垂於救
度故高真顯述於禳祈伏念臣生質至愚福基甚薄過冒塵於祿仕致時違於述
遭近屬偏親偶嬰沉疾上池良術未臻瞑眩之功太洞仙科敢發依投之願丹誠
纒起善應俄彰果諧勿棄之和遂獲調甘之適因涓吉旦載潔公庭案藥簡之彝
儀叩玉清之飈馭仰祈至鑒大布鴻恩息疴癘於四時集禧福於百順慈親上壽
倍延仙籍之期人物畢生永協養堂之慶舉族均蒙於保佑所居咸遂於康休上
酬陰隲之隆誓守勤行之志

蘇魏公文集卷六十九終

蘇魏公文集卷七十

宋太子太保右僕射同中書門下平章事司空魏國公蘇頌撰

逢年

裔孫萬靈重祿

祭文

耀庭

祭濮安懿王

代宋相

伏以國家系本仙源慶叢帝祚累聖積厚洪支益繁漢家二等之封並崇爵邑唐室百孫之盛咸萃京師蓋上聖敦睦之禮隆故諸侯信厚之風著綿綿流澤永無窮惟王以方重之資兼粹和之美居家樂善服東平之言好古知書得河間之尚向承繼世之典首膺開國之封位極公侯而無貴倨之失地長邦族而有孝恭之稱對時寵祿而益謙視古賢王而未愧故能保其富貴享是壽康為表儀於宗藩方加異禮掃內外於正寢奄謝明時國邸纏悲宸襟結愴追榮近壤陪葬崇陵惟善始與全終非至德而奚逮某叨聯右府嘗接近班於祖軸之在行空瞻前緋潔壺尊而薦信冀達幽泉神鑒不遐丹誠是諒

祭王叅政

嗚呼天以粹氣畀於格人公享其厚積為懿文帝倚羣賢登登王度公被其用時稱哲輔爰初擢秀冒冠俊良凌厲霄漢羽儀周行書坊網繹禁複徊翔發於事業見乎詞章謨誥雅畧詔冊昭莊公備體要訓言汪洋筆端膚寸利澤多方臺閣規模朝廷憲綱公所典領咸推練詳奉行故事才宜佐皇進登斗樞遂參時柄悟主以道矢言必正弊去多門朝無倦令天子謂之匪直也令公在廟堂於茲八稷四方宣力百為盡瘁密勿軍國寅亮天地才難善職用未殫志方加寵榮式光大議宜錫難老示登皇器寢疾決旬訃音遽至宸扆興嗟輦輿出次載念忠良軫傷後事歸贈加等冊追端揆密印襪章以告其第恩榮始終是旌遺懿士倫戚嗟相顧隕涕凡我嘗僚舉同反袂清醕載觴看羞式備薦以哀辭庶通誠意

祭楊尚書

天以正氣鍾乎賢人公稟其生拔乎類倫皇鸞儀儀為瑞聖辰金相玉質內動外溫弱齡馳譽富以高文躡取科甲跬步青雲常用嘉之擢於紫宸前視卿相進亦逡巡經綸之志始發復埋萬里之馳半塗而屯遭此大厲孰訊穹旻乃令士林愴失良臣嗚呼哀哉士以文稱或窘於用世豈乏才疇克兼眾觀公為之靡施不中其器無方所利則重鎮亂治煩不撓不縱其在內庭忠言日彰道宣上命德音鏘

洋見於事業作為文章訓辭深厚詔冊和莊寸毫尺管利澤四方入為御史百僚
端肅出臨粵藩千里蒙福再尹京都風行輦轂三提計權事著條目簿牒放紛裁
處彌速弊源窒除吏手斂縮平居與人侃侃樂易遇事果行正色無避敵介來朝
欲自矜異攀我官儀微以殊禮人難其拒公立庭止且謂戎心浸不可啟抗辭毋
撓卒正朝體人謂公才效於已試餘刃沛然銘若初礪使其且壽何向不濟今亡
矣夫孰不揮涕某等嘗以僚契幸茲交從義分之篤心照誠通良友逝矣齋恨何
窮緬慕遺德徒留清風有觴薄奠聊寄深悰平生不忘魂鑒於衷

祭楊侍講

嗚呼古之儒者專門明經師學相傳異端不行末流既敝小辨滋萌衆說譎譎講
解縱橫孔鄭諸賢古訓是承優入聖域闢其閑闕排斥異議傳注乃興由是微言
皦如日星後學尊宗視為準繩知其說者足以自名懿懿夫子業專志精守經據
傳先儒是程通解六學早擅厥聲由茲仕進躡取紫青僕射宣公時之耆英師友
兩朝領袖諸生士游其門皆為名卿子以高第被其薦稱入侍金華講勸西清惟
其哲后好古多能清門訪道眷於老成惟子被遇恪恭壹誠專用師說開悟上明
陟降一紀便蕃寵靈陞官瑣闥躋職禁局朝廷禮待均乎老更稽古之力何謝桓

祭王宮保
祭劉丞相
祭天畀五福貴壽康寧為儒始終亦鮮并今已矣夫歸於杳冥轎帷即路祖奠
載庭言還東國反葬故塋凡與嘗僚興言愴情清觴告訣魂兮是聽

祭劉丞相

嗚呼江漢氣清虛衡地靈孕奇擢秀良才是生公鍾厥美逢時奮榮少也穎拔性
若天成偶過魁壘稔於人聽挾策藝苑來儀帝庭文學高等名實飛騰其器既利
其發必異立朝勁挺不倚不陂施於有政流為慈惠江湖之間民謠吏治帝用嘉
之召還近次乃伊京轂撥煩無滯乃貳台鼎預聞朝議中書政本國體依係任以
大柄非賢孰寄公之登庸上尤注意躬當眾責不疚毀訛剛果內持由長而濟委
寵出藩亦諧雅志二邦偃息風力彌厲膚體且強歡言自遂如何奄忽頽然近逝
嗚呼人生有涯寓形斯世旋復遷流詎非夢寐道信於時乃生之貴神歸於本非
歿為累惟公通悟固得於是人情恒化徒懷風美奏訃來上中宸戚傷厚其贈典
加以襚章君恩始終拊存念亡瞻彼轎車言經甸疆精爽如在游好未忘尊酒盈
旨俎羞令芳至誠是薦魂其迪嘗

祭王宮保

嗚呼人性之稟異其柔剛或失厥中非悞則強公履其和外溫內方行不詭激道

無迎將文雅雍容冠映周行歷踐世官無忝前良鉉職業勤勞不忘臺閣規撫時推練詳國史善志裁成義例禁林起草久參嚴秘擅筆削之三長演絲綸之七制登貳公衮預聞政治啟沃嘉謨奉行故事進不務乎重任退亦安乎閒地洎執憲於中臺復抗論於大議班聯為之慢動貴悻從而推避蓋語默之適宜亦始卒之無媿方告老以歸休遽委順而長逝嗚呼吉人為善實獲於天富貴壽考德優祉全其所痛者不及百年道既行矣夫何恨焉凡我嘗僚徒茲愴然聊陳樽篋之薦告訣帷裳之前冥冥可通神其聽旗

代宋相祭王宮保

夫天下之達尊者德爵皇極之享福者壽考是為具美鮮或兼全公以文藝博通行義修潔躋仕華旦則揚歷於臺閣預議大政則練達乎典章踐履高危之塗優游不競之地惟進退不失其正惟明哲以保其躬出守外藩入侍清燕用之不侈於權利已之不易於常操蓋守道能固自信不疑古稱善人在我無媿至於更任任之美則掖垣之顯華憲臺之權寄近輔貳公之貴尚書八座之崇並中朝之要津極一時之清選公皆薦居世職克紹前烈暨夫年至傳家請懇納致聖主嘉其止足時論推其恬夷雖不及享期頤之齡遂喬松之志卒以中壽歸全巨室茲可

謂善始令終全名無玷者矣某並遊榮路仰止才量痛故人之長逝嘆清風之莫追恭薦菲儀采傷永訣

代杜丞相祭范資政

嗟嗟希文於是已乎哲人已矣孰不悲呼吾失我友天乎祝予福善之報意亦何如我思若人才質美粹識通道廣心和色毅政事文學聖門高第蹇蹇匪躬王臣之義克全厥修以輔天子在天聖間猶為小官屬時無事法弛禁寬論疏利病書聞展前上察其忠擢真諫垣國蠹民害造膝極言三黜無愠天下稱賢氏羌負固抗吾王旅召還遠邦更帥西府令肅而壹士豫以附書責渠帥敵氣敗沮果入請和復期其故告厥成功登贊台輔亦既遇時知無不為修明百度更張四維銓度流品經制邊陲事靡不舉政無缺遺始進以勤竭精宣力俄罷而休謂宜偃息忠臣倦倦遠不忘國王事一碑為我心惻寒暑交侵中若結轡東徂不歸大病俄革呼呼大名罕兼五福難具人得其薄我享其厚任歷三公不謂不偶年過六十不謂不壽所可惜者居位未久經濟之謀莫克盡究今亡矣夫餘慶在後某也無似處時寡與辱為交遊聲氣相許氣闊晚途南北修阻不意一別乃成今古君喪在徐我居於宋欲往莫得臨風愴愴言念平生奄忽如夢薄奠寄誠心焉如痛

代張端明祭范資政

元間積粹降為賢智華我王國居然廟器生都顯榮歿有徽諡全斯令名在公無媿公之處躬挺持不羣個儻大志上千雷雲策名從仕英稱動人人皆謂之才宜致君公為文章據經守道時務華淫我尚體要論述古今發明世教非苟知之亦思允蹈公為諫官慷慨敢言自下劄上弗屈要權帝用嘉之擢實禁聯終靡悼害三黜三遷公殿西陲歷更四帥躬提成師瞻威遐奮羌人卒和請降納質我實尸之時為長利公登廟堂左右聖皇更贊二府弊革維張肅將朝命拊循邊疆務在經遠煖席未遑公之出藩時乃均逸不誑下遷首公如壹詔條敷宣民隱勤恤身居江海心存王室公適逢辰且更大用疇不屬之宜壽而寵云胡靡謚摧我時棟人之云亡士倫所痛某早歲之幸辱公周旋鄉閭相從日接燕閒洎登禁闈嘗從內班昨麾武林復踵於賢朋好之篤晚乃益堅論議相直中無間然江干交臂俯仰二年何言此別遂成終天薄祐多難家遭艱釁居睢陽咫尺徐鎮聞公之喪百感交進欲往弔之滯留為恨言念平生聲容未忘設位寢門悲酸盈腸遣使致奠疏肴絮觴精誠不泯歆此令芳

祭呂侍講

鼎旌華裔載德衷誼馮承慶靈是生俊又顯允惟君挺奇拔類廉方閎深華國之
器壯志矯矯吉士登朝考室肯基有服王僚謫乎令聞卓爾孤標頡頏一世凌厲
層霄渠閣校文義類有條詞垣演誥德音孔昭進階嚴近出殿藩郡帥鉞威稜遠
人感信仁風四方歡謠三鎮還尹日畿并蒙河潤亦既罷煩沓承乃眷進讀金華
侍遊清燕臺閣規撫素號詳練旋更典領莫非華選爰彰美才見推諸彥在昔先
正佐時積勲勤榮二紀迓衡秉均英聲未泯餘德在人我踵厥武佩荷紫宸天子
命之曰惟帝臣時亦稱許富繼相輔璠璣之寶始入天府棟棟之材未陞堂礎康
莊方馳崦嵫忽暮彼蒼難問殲良何遽才志弗就命力誰預仁者有後茲言則然
允苦而家積厚於前一門盛美諸季蟬聯奕葉流光有嗣象賢君子之澤曷窮其
源如古所記魯臧漢袁某等久接餘慶幸偕禁籍官或嘗僚情惟莫逆初聞告歸
俄痛疾革詎期信次乃異今昔素旌翻翻東去都門哀歌咽路祖翼愁雲何以致
誠挹彼清樽何以洩哀寄乎斯文

祭陳侍中

代宋

若夫剛方直清上賢之性溫恭誠懇君子之行公實得之氣全守正積是具美由
乎善慶矯矯勁質來儀聖辰喬梓修榦璠璣粹溫爰在初仕藹其令聞遠守一麾

抗疏天闈帷帷大議極陳本元先帝嘉公峭直敢言越從遐陬擢實諫垣皇上謂公朝之懿臣登輔大政弼於一人顯允先政勤勞王國參預近政時推邦直清風未泯仍世載德至公益大遂冠樞極公卿不慚父子善職公為大臣體貌嚴粹正色於朝不懈於位進惟主知退無外比兩當鈞衡推任在己心持公平孰疾譽毀繩以古人奚求勝彼公之處躬謙謹畏栗言無易由動以禮率萬石謹厚博山慎密既明且哲克保終吉還政之請不待年至典冊命之三公還第優游餘年方諧雅志胡不遐壽頽然遽逝奏訃初上中朝愴悲趣駕臨奠恩加等夷衣豹冠命以襚之君臣終始千載一時公榮近郊連江崔魏築闕道旁再世安茲芻塗即遠龜筮告期徘徊赤車駟馬載馳凡我嘗僚永懷清徽音容邈矣興言涕隨薦以清觴靈其格斯

祭張宮保文定公

嗚呼景德後元協洽記歲連珠耀芒鷄火之次鍾秀於人為時之瑞矧在九秋天晴氣霽月正下弦光連五緯公生是時得天精粹金聲玉質渾然國器嶽立淵渟出乎倫類剛則不折柔亦不廢危行危言可止可仕兩策賢科簡在仁帝四入內庭晚登三事並歲諸公孰不隆貴或踐於衢半途而逝惟公始卒德充福備七紀

康寧閒堂遂志一品晏安萬緣泯棄不怛物化考終蟬蛻生粟純靈歿全浩氣騎箕入昴孰知所憇文光之名空遺永世孰是孤生早緣素契爰自弱齡獲聞教義提攜成就愛均子弟每侍燕閒兩忘年位名理之談或容難議間雖久音書沓至昔聞公喪適拘朝綴臨弔無從荷恩有地今叨守藩過公里第言瞻松檟交揮涕淚一觴薦誠百感中萃永懷德音沒齒無替

又

惟公稟德河嶽王者之輔出而逢時道則靡阻初來公車量董首舉言配乎經行應乎古禁垣黃閣雍容步武遠猶闕議沛沛孰禦公出在外心留帝所悵悵懷忠盡心不顧剛必摧之非柔則茹惟是全德一代之矩矱我先公金石之契臺閣同升道義一致伊音侍側話言在耳辱登公門垂今四紀出處契濶造請莫繼謂公難老天錫之祉遘疾未幾孰云不起訃來慟哭我則何以薄奠致誠尚或鑒此

代中書祭秦國公主

帝唐之盛女曰娥英爰周郅隆王姬振聲粵我仁祖跨唐軼周溫溫太主實茂芳猷惟主之賢慈和柔惠其質蘭薰其儀玉粹結愛帝后孝恭天至執勤傳保言容具備往擇好逑屬在下門恩降下嫁禮視維藩爰開湯沐爵命再頒成此肅雍車

服以蕃寵冠三朝義先近戚帝錫之祉光華赫奕云何不淑遘疾斯亟捨此明辰
歸於厚宥帝念仁姑曾不永年悲興長樂痛軫慈顏奠喪制服追愴親賢適臣督
葬卜吉新阡肅肅帷褻巖巖函薄神閔啟銘靡孄即路潔此饋羞奠以清醑菲誠
是將明靈斯佇

代中書祭唐叅政

致祭於故叅知政事贈兵部尚書唐公之靈惟公稟江漢之粹靈挺荆衡之材秀
來儀上國自致青雲在仁宗朝以峻節清規擢踐臺閣登侍禁嚴在英宗朝以重
名遠畧入長風憲出臨藩州今天子綜覈功名寤寐賢峻召公方面委職計度不
及一時叅輔大政惟其彌綸之縵施設之宜資適逢時而命屈於中壽才可經遠
而道卷於半途公之云亡國之不幸茲所以嘗僚之列周行之閒靡不茹痛於哲
人而齋咨於遺直也命龜協吉輅車云發醑以清觴愴乎永訣

祭秦國太夫人

粵若人倫之美惟德及齒婦道之榮在夫與子展如夫人備於是矣夫人之生稟
質柔明始自華胄歸於名卿宜其室家是鍾慶靈毓我邦傑為時宰衡君臣一德
旦暮千齡夫人之賢辨通明智酒醴澄潔蘋蘩助祭季姜通達行必由義鄒母善

無委人公文集 卷八
導處亦擇藝閨風嬪則流徽當世夫人之貴圭徽一門子登上台女從大臣袞服承顏副筭寧親晨羞列鼎昏定重茵階庭獻壽孫婦誥誥惟先令君德履有素命不副才位止郎署君子之澤乃詒厥緒夫人克終享其榮祚朝尊元宰家承異數陪封大國冠班外婦歲時入覲持隆眷顧壽厯耄期體彌強固委化而終伊神之祐夫人之亡哀戚道旁相君摧瘠天子嗟傷詔加恤典宴輟春觴內嬙視斂王人治喪旬浹之間弔使相望婦之貴者前誰比方是亦德茂乃茲流長某等並遊相庭恭承母德教義所敦頌歎無斁令聞轆車言歸厚窆茹挽盈路羽儀連陌聊停總帷一奠輶驛至誠是薦神其來格

又代執
政

惟靈以淑質異稟克生良輿之家以懿德令儀作嬪華顯之室動遵圖史行為楷模頻繁事公侯之宮輻軸知將相之事毓我元輔登於上台千載之聖賢相逢一門之忠孝兼備雖民心屬望本王佐之高才而朝寵載加推母慈之善導是以襲封號者二紀冠嬪班者七年膳羞旨甘食萬鍾而無嫌康寧壽考享五福以斯全方且榮鼎茵之在前祝椿齡之難老極是孝養樂乎盛辰何生理之有涯遽歸全而委順相君鉅創宸宸驚嗟厚恤而紆詔函臨宴而罷朝會內司賓省其歛服大

謁者治其葬儀恩禮之隆本由乎上眷命婦之貴絕比於當時終始不移哀榮斯極某等備員公府接武相庭早聞積慶之餘竊增嘆企今愴遷神之遠祗益摧傷望祖緜以致誠潔壺觴而為酌芳魂不泯嘉薦是敬

祭歐陽少師太夫人

彭城郡太夫人之靈挺生德門作嬪良人閨風闡儀睦於宗嫺淑質懿行宣爾子孫恭則順婦賢則慈母鍾慶令子為時良輔立朝汲直出藩召父躬扶版輿尹茲留都羞殮潔膳昏定晨趨華髮垂堂家人愉愉承顏順色能竭其力胡不百年遽喪賢德徽音已遠孝慕何極太夫人之生既福且榮大郡疏封再加寵名六紀歸全亦謂遐齡厥日惟吉輶車南出翩彼丹旒挽乎素紼哀慟路人慘變朝日某等咸以備員趨府踰年實事令子有惠有恩聞夫人喪孰不潸然哀意難見敢致薄奠聊寄悲酸非取豐腆靈鑒如存享此誠薦尚享

又

惟靈夙稟柔儀內蘊懿德歸我良士是生哲人湯沐啟封再被絲綸之寵旨甘為養奉承晨夕之歡方享輝榮遽傷殂逝眷留京之諸吏實子舍之嘗為獲遵尹正之規素欽賢母之範旌車南邁傷永闕於徽音有醑致恭敢少陳於菲禮芳魂不

蘇魏公文集卷七十終

蘇魏公文集卷七十終

蘇魏公文集卷七十一

宋太子太保右僕射同中書門下平章事司空魏國公蘇頌撰

逢年

裔孫萬靈重祭

祭文

耀庭

祭杜侍制

代歐陽

故慶州經略待制杜公之靈惟公之才時推王佐有文有武萬夫之望頃自郎署使於南荒夷獠震聳請命不違更鎮北地威懷西羌彼有犯命立寘斧戕邊陲晏然帝稱其良如公之賢宜壽而臧胡為不慙今也則亡秋風蕭蕭汗流湯湯扁舟西來載公之喪故人守土逆於河梁一奠致誠我心增傷尚饗

祭李賓客

故留臺賓客李公之靈若夫三品通班五紀中壽惟公享之福善之祐聞望在時清白遺後歸全美名歿且不朽遠日啓塗素旌引咎一奠致儀哀誠莫剖尚饗

祭杜監簿

將作監主簿杜君之靈挺生慶門稟服義訓初仕卿屬方廣家聲煜乎其華秀而

不實割慈天性均愴路人薦以菲儀達乎幽壤尚饗

祭王秘校

嗚呼子與子直世篤朋儀越在稚年遊從講誼兩家情親各有兄弟輦寺同館秋闈並試愛子襟懷脫落閱肆嘉子文章俊雅麗謂如子才必用於世吾儕齷齪曾莫跂至不見數年聲名益熾先後相望並收科第子尉宛邱子職京師傳聞治聲民歌詠之竊嘉歎私有友如斯子罷陝官子方忝麾承以疾苦相見無期既來汝陰子以喪歸不見神鋒乃見裳帷興言愴慟涕洟念昔相從情彌眷眷二十餘年流離憂患同輩幾何會而復散今乃與子生死間斷長年多感動增喟嘆况復懷感心推意亂胡城子居鯛陽子臧日月有期吉在仲商幼子未立母兄治喪交友來弔撫事悲傷肴醴奠之詞以侑觴

祭王侍御

惟公德業之茂資歷之美蓋有朝廷辭命諸公狀誌贊之詳矣固非晚生末學所能稱述其彷彿也重念曩以世契獲拜座隅復得與公諸子交遊義同子姪是以蒙顧之厚不與他比今茲守郡見公松楸感舊愴懷不能無慟恭奠薄醴以薦丹誠

祭韓殿丞

夫以萬石承家累葉濟美能用優學仕於明朝振鷺在庭早通於閨籍左魚為郡已試於吏能方將凌厲亨衢顯揚先構才用既適志局巨量降年弗長中道而畫相君動猶子之戚士友傷秀林之摧轉旆將歸豆觴為奠來歎菲薄用表信誠

祭故潁州通判鮮于都官

嗚呼君之立朝淑慎端純君之奄忽哀感路人藐爾諸孤煢然老親賴君以生天胡不仁既奪其壽其居則貧翩翩旌旆潁水之濱酒醪既酌薦俎交陳詞以寄哀聞乎不聞

祭張職方

惟公行實內蘊名為衆聞學以干祿忠而事君孰謂中道遽喪仁人公之季弟與余同第今又同官實敦厚契聞公之亡潛然隕涕徒臨殯柩音容莫際魂其有靈敬此誠意

祭外舅辛駕

昔公守遼旌旆去國秋郊莽蒼愴離行色昨公罷郡還朝有期日望西域車音何遲忽得公書情深眷眷語以疾革留於南甸初聞驚駭恨莫得見曾未旬朔遽罹

魚... 卷之二
禍變人生契濶固不可量自昔別公膚體方強豈伊三載乃發公喪一念及此百
憂盈腸嗚呼哀哉公之業履清芳粹美孝稱閨門道信閭里人皆趨時我獨用已
甘節令名始終無毀公之莅官嚴而不殘繩吏以簡政民以恩柄臣薦之才宜治
煩三郡風績遺愛猶存天於善人慶常在後才不必貴賢不必壽古皆有死磨滅
誰究惟餘德澤歿世不衰公之世冑義烈相承忠獻之裔雜選簪纓晉國諸孫亦
既顯榮朝閨郎舍弟聯兄繼公有令子是詒是似伯也寔才自為良吏仲也多文
足致名第肅肅清風茲焉不墜某早以愚莛獲奉姻連名非肅感愛同張侯風期
相許恩意綢繆追念平昔音容莫留帷堂在望奠觴遙隔馳茲絮漿貳以有核禮
毋非廢哀緣情極魂鑿不忘款此誠幅嗚呼哀哉

祭外姑高夫人

恭維夫人之令德壽考柔聲懿範某已紀銘於石傳告來裔非茲詳言而後信也
顧惟鄙陋叨預姻列蒙被厚愛二紀於茲而以薄仕羈繫得侍几席者曾無幾時恭
聆赴音愴恨何已又聞已得吉卜合祔先兆復以罪繫朝籍不獲躬陪執紼之
末追念音容永隔泉壤恭託薄醑用將微忱摧痛在心神其來享嗚呼哀哉

漏港灘祭男賴士

三十一郎穎士之靈汝生十年而警惠超拔蓋有過人者誦書秉筆志趣已高承順親顏未嘗違忤而又奉侍太夫人朝夕不離左右衆人知汝為孝子矣應接中外吾方有賴於汝吾遷東陽汝喜其行不幸道途遑遽遂罹覆溺之患喪爾淑質時我之辜觴事寃摧痛徹五內以爾之夙悟早成雖遭橫夭必不至於為妖為厲使人惡忌固宜證無生而入有生應變而現當為賢而為才光顯將來不然桐山之高巖臺之清可以遊神接靈與川岳並秀亦汝之素情也寄殯佛舍倍愴吾心拊棺致誠一痛永訣

祭亡妹張氏五縣君

爾生有懿淑之質故先君僕射持鍾愛焉早孤不天予主宗事為爾擇配久之始歸呂氏呂大宗也爾能恭順協睦不失婦道未幾而喪其夫子以爾又歸張氏張君志士也爾能淡薄靜專克成夫志不幸復失良人以子幼未立來還吾家予方謫守東陽奉太夫人之官爾時實在親側晨昏就養宜無嫌於爾心也今者舟過漏灘覆溺之患實予薄祐致汝無辜寃痛號呼不能止抑爰以吉日塗厝於新定佛舍惟是寃交之事則張氏有子可以歸葬矣呂氏有子可以承祭矣冥識不昧必有所依臨殯致哀心焉如割

祭甥張氏子念二郎獐老

爾父懿行清文士林之傑既不克施於時中道而殞神理祐善謂宜鍾慶於爾躬未易量也方從母氏歸寧我家且使就學以成爾善不幸道途罹覆舟之厄遂致不救冤痛摧切我心如何權借僧坊又從爾母氏之柩酌以薄酒用寄悲懷

潁州謁廟

刺史奉天子命長臨一郡境內之祠禮當有事必修謁而後敢治惟神福民祐善一境所依賴奠獻之數不敢缺也

南郡謁廟

伏以大火故墟興王奧宅建都立國主社與民明神是依命祀攸謹致恭謁欵舉有常經某近忝授符爰茲守鑰初臨署位君命斯虔越瞻嚴祠望祭惟舊敢用羞幣祇薦懇誠所冀聰明歆此菲薄誕格純嘏孚祐茲邦非惟長人獨受其賜

又

某忝被朝命獲守郡疆肅瞻靈祠實奠奧壤適茲臨蒞之始敢薦吉蠲之誠仰欽明神大庇庶士惟時降福俾民用康祇鴻休報敢怠常典

南郊禮畢祭諸廟

比者國家精禋太室配帝圓宮熙禮甫成大賚斯洽着靈祠之遺烈飭守吏以備儀鈇薦苾芬庶陳昭報諒惟神鑒歆此德馨儲福祉於生民息沴災於列境和平之格遐邇願同

英宗皇帝即位祭諸廟

比者皇帝祇適先猷嗣隆丕構霈宣大賚敷告多方欽修三正之宗祇款萬靈之輿敕守臣而致禮在祀典以必虔爰罄吉蠲用嚴昭報仰祈聰鑒備享德馨相邦祚於泰寧擁神休而錫羨惟誠所格雖遠必通

祭雙廟祈雨

唐故張許二公中丞之神自昔至德之初公以忠果殞於睢陽後人感慕風誼祠而享之於今且三百載而嚴奉如存者得非以公生既有禦災捍患之功歿當有遺芳餘烈福於生民宜乎歲時報祈載在祀典不為無益也今涉秋閔雨將害潦盛某為長人惟茲是恤心雖深念而力不能救是敢夙夜齋戒致禱於公公既血食此邦惟民是依固宜享於潔誠應以甘澤使已稔之稼槁而復茂將耨之種時其稔登擊公之賜也公其鑒此

祭喬太尉廟祈雨

漢太尉喬公之神合宋之境古祠以十數其最為民所向信者公之神也去歲冬旱某始齋被請禱祠下未信宿而獲雨雪之應於是歲時報賽未嘗懈於禮焉今年自六月不雨至於仲秋禾菽既秀而將偃釐舜已種而不入農疇咨閔某實念之不敢不再告於神惟神嚮既受報於民固當恤此災沴復興雲雨潤澤一方使時無艱食之歎然後神享豐盛之祀益無媿也

祭喬太尉廟謝雨

惟公持起睢陽逮事漢室威名振於郡邑勲勞顯於朝廷當官靡憚於權豪外學不壞於仇敵有知人之鑒則時雄慕其德有息民之志則夷貉肅其強至於屈邦君之尊以狗幽人之節可謂通矣割幼子之愛以除質劫之患可謂果矣其懿績殊勲伯喈之銘見矣其令謨明訓孟德之文備矣故去世千禩而英風凜焉梁碣之間里名未改陵墓之側喬木猶新肇彼京都巍然廟貌春秋奉享典令具存昨以急景窮冬愆陽為沴天澤差候而弗作時令當寒而尚溫顧惟長人莫遑寧處徧走羣祀交薦令芳緬瞻故墟默致精禱以公生而利澤天下歿而血食此邦必能顯如在之靈動至誠之感曾未經於累日果獲應於其嚮千里王畿畢流於滋液百嘉生物咸達於枯芟冥旼如斯誠心敢怠是用躬率僚吏潔滌牲牢咸造闕

宮祇陳奠，掌少通指，意用達神休尚，期嗣歲之間，更賴陰功之助，冀風雨之時，若俾繁盛之畢，登則夫賢傑之威靈，亘古而不泯，吏民之祈報以時，而益虔，豈不偉歟。

祈雪

歲云暮矣，時宜固陰，而天澤未臻，冬溫為沴，地爽民潤，民虞燠災，封圻之間，神靈斯主，是用祇祓，設醴恭陳，懇誠冀陰隲之下，通格至誠而來，應使同雲之瑞，邑自府以皆流，則潔潔之心，吏與民而敢怠，至誠之望，神其鑒茲。

謝雪

昨以候戒迎冬，時愆膏澤，爰陳嘉薦，致禱嚴祠，曾未浹旬，果獲冥應，其雩之瑞，已洽於農疇，休證之和，抑由於神造，敢具芬馨之禮，少陳報賽之勤，冀與齊民共蒙陰隲。

祭喬太尉廟祈雪

向以涉冬愆亢，編戶愁嗟，不遑寧居，是有齋禱，今茲時雪，猶及天正萌甲，稍滋均種，不爽，敢具嘉薦，聿恭誠報虔，佇不應嗣，滂甘澤，冀獲豐稔，以康兆民，昭事之勤，敢懈常禮。

祭諸廟祈晴

封圻之境綿數百里生齒且億仰於嘉生今茲歲成水潦薦降菽粟被野稔而未獲田萊既汙種將弗入而陰曠彌月淫霖數來天災之行實自人召幽有神化主宰其間夫政事失時咎由守吏案盛不告職在有司編戶何辜反罹於害長人無狀當被其責敢用踈淪祗薦懇誠惟神聰直為靈慘舒是任宜恤羣望收霽層陰使收登不害於有秋播殖無妨於嗣歲豐和期報稔疹畢銷民獲阜安繫乃有神之賜

又

雨之霖淫二麥垂害必有所以戾陰陽乎今天子聖神惠愛以虔天命以仁下民宜無是理也傳稱宋大水公曰孤實不肅天降之災今刺史古諸侯也千里蒙病咎將誰執賴之人薦饑者累歲祭祀不豐禮節不舉此即開霽高大冇年倘刑罰鮮中政教

缺

祭張公龍王廟祈雪

祭於張公龍王之神伏以應龍之德神化無方靜而淵潛則其用莫見動而天飛則其利尤博故大易之所贊三聖之所述其至德盛美豈虛也哉賴之近境地有靈泉神物所蟠廟貌斯在風俗向信州邑報祈歲無饑凶實賴神貺今亢陽為沴

雨雪不時嘉種將枯民用咨怨某受天子之命作吏於茲惟民疾苦之是憂惟時災眚之是恤所以夙夜惶懼將祈於神察俗舊儀挹彼源液惟神昔嘗應化於是邦今則血食於一境必能奮起利用陰運化工驅風召雲灑潤流澤使千里決洽五稼滋茂時格和平人叶康靖非獨守吏蒙其福釐抑所以延神休於無窮豈不偉歟

祭張公龍王廟謝雪

近以冬暘為厲農畝愆澤徧走羣祀未獲嘉應粵瞻淮壖蓋有龍穴嘗顯異跡奠此一方爰徇民心遵用祠法靈泉甫暨陰雲遂興雨雪其滂遠近告足恭惟龍德潛用利見莫測豈守吏虛薄所能感動因薦肴醴昭報神休冀無後艱以永賜貺

祭諸廟謝雨

向以自秋涉冬旱氣為虐並走羣望嘉應尤虛所以夙夜祇懼不遑寧處念人事之未盡不敢歸之於天時恐誠意之未孚不敢慢之於祈禱果蒙神鑒爰降甘澤田疇稍蘇播種漸入迺涓吉日用薦嘉牲昭報厚賜以光靈德尚冀滂沛之惠無為後艱登成之祥亦冀冥助

祭張公龍王廟謝雨

向以常陽寢嘗應時不雨農疇闕播種後期雖徧請於近祠尚有遲於嘉應俯

因眾欲單竭至誠願瞻靈湫實惟龍宅挹茲泉液置彼淨方罄夙夜以致虔迨泆旬而非懈陰雲甫集甘澤沛然長人之心少獲寧處千里之廣頗遂膏蘇因薦醑有昭報休惠光令名於不朽冀丕祐於無窮

春祈嶽廟

惟帝作鎮岱宗奠居正位眷言茲土夙奉嚴祠仰憑威靈大庇生聚春陽戒序精意告虔式矧善祥普安氓俗俾歲時之有獲庶瘳癘之潛銷遵奉鴻休益虔大報

春賽諸廟

伏以壤地千里畫為封疆必有神鑒陰為主宰惟是春秋祈報之事載於禮式守臣奉詔豈敢怠常惟神歆此馨香賜以冥祐使歲無水旱之沴疾疫之災繫乃有神之貺也

秋賽諸廟

伏以州壤千里山川之神禮有常祀為守土者當奉祀焉夫神者惟民是依民者惟神是庇今歲事登稔時無凶災實由神之賜潔粢豐盛薦享不匱亦為民而報也聽直之靈庶幾其聽之介以景福使無後艱實守吏之幸矣

祭勾芒

惟神體配乾坤功施先稼條風啓發脈土震渝淑載有期早晚宜示庶穰疢書將獲豐登

祭土牛

爰出土牛示民早晚因茲肇序恭薦今芳教民有初抑用敦本神其昭監祐以善祥災沴不生蠶稼登茂敢忘虔祀用答純禧

又

條風解凍陽律茲始土牛著象以示農耕惟神協輔帝功發育生類用是昭薦默祈純祐宵雪屢降隴亩既滋庶蒙善祥克遂豐衍民食無害蕃禧所臨敢忘禋祀祇答靈貺

祭魏武帝

帝肇興王業大庇生人血食此邦威靈如在式臨春序虔奉祀儀冀錫繁禧垂祐羣品民所仰止神其格思

祭窮后

神官有世功廟食此土方春發育潔祀神靈虔奉國章載陳牢醴冀蒙丕祐普及元黎以時降康慰民望歲報功之典吏職敢忘

祭城隍

神莫守封疆實司水土惟城郭溝池之固賴聰明正直之依式屆仲春聿陳嚴祀奠曲垂於靈貺期永庇於民居

祭牛龍

神以坤順之體協乾剛之靈瞻彼城隅奉茲廟貌仲春屆序薄祭致虔冀霑澤之時行慰庶民之望歲

祭五龍

神四靈之長五方是司肇興風雲繁育稼穡適當春仲用展祭儀冀時澤之不愆俾歲功而有獲

祭土地

神施主庶品大庇羣倫式瞻靈祠近奠公宇仲春屆序薄具告虔敢祈及物之功曲降順時之祐

祭天王

神佐命上穹奠居北洛護連營之勝氣夙仰威靈鎮堅壁之嚴闈式遵虔奉仲春屆序薄具致詞敢冀神聰薦降時祉

蘇魏公文集卷七十二

宋太子太保右僕射同中書門下平章事司空魏國公蘇頌撰

逢年

齋孫萬靈重葺

雜著

耀庭

麻者天地之大紀賦

聖人以通天地之數

昔聖王建官司地因象知天推麻用明於大紀考星咸自於初躔合三體以為元成書最密舉二篇之定策備數無愆古有善談載於前志因太初創立之首述往聖知時之義莫不究極象數精窮天地有時以紀夫啓閉有日以紀乎分至躔離弦望也於此而為正晦朔昏明也於此而攸示下可辨乎斗建上靡差於辰次惟君審璣衡之運所以緒正於元功使民知寒暑之來然後順修於時利况夫麻為一歲之本紀明太極之基惟精禋之至豈深思之與知必也迎辰以策定晷於儀帝堯則義和而分命顓頊則重黎而是司皆所以準厥二氣乘於四時聖有作也人皆度之制自清臺得舉正履端之要職由太史盡觀文察理之宜若乃辰集於房日窮於紀孟陬既協於月建攝提亦隨乎杓指國既頌正朔以為令王乃觀情

性而順理章節元之書兮著於彼子丑寅之正兮見於此可以察發斂於未然定
慘舒之所以推其生律子陽午陰而互分治以明時春作秋成而是擬且夫天之
運也日與星而代逢地之道也柔與剛而莫窮非乃聖無以探其蹟非立法無以
舉其中我乃錯綜氣候參稽變通起建星而運算故積歲以成功考連珠合璧之
辰得名尤遠應大呂黃鐘之統立道斯同用能鉤校舊儀審觀新度成敗因之而
遂紀氣節於焉而可步於以極陰陽之大端於以備五六之中數亦何異曾經比
事舉二中以歲成義易窮神合五位而象布後王以是曆象不可不審紀經不可
不循或立元而謹其始或節事而授於民馮相則致乎日月保章則志夫星辰以
定五十五數以通三百六旬所謂見道而知治何患以天而占人彼為刻漏以考
中星但紀昏曉之度處璇璣而觀大運蓋明氣候之因猶未若測運動於二儀齊
往來於七政建乃星紀先夫算命吾皇所以監古曆之尤疏頒新書而考正天人
之際因以明焉乃知夫作者謂聖

省題詩

象載
喻

一人敦至化象載效嘉祥美澤昭仁感皇華顯道光再馳聞檻檻無外表洋洋華
轂初彰瑞推輪異服箱器車雖比美泉露豈同方薦廟歌休德神靈祉式揚

南廟策問

問周制王畿千里其外則九服諸侯之地也而周禮所載六卿之屬三百六十皆王朝之官其名氏之繁密典掌之閒冗若司市校人賤者之事皆命大夫僅乎數百隣長比長才治五家皆命士故至於萬人夫以千里之畿四郊鄉遂園廛場圃之外為田十有一等官府之給六軍之衆封賞之地皆在其中其餘以食萬官宜若不足而當時行之為便凡九政之斂致財賄之入亦寡矣而大祭祀大賓客大軍旅大田役四者之勞無有虛月度其經費蓋不訾焉而當時不言其乏我國家統一海內四鄉萬里皆為郡縣一毫之賦悉歸縣官司會核入宜若有餘然其設自省寺至於州縣不過萬數比周亦減矣而議者猶病吏員之冗勞於供億至於郊廟祭享數簡而禮略朝會宴飲歲不過二三師田講武稀濶而不行軍興調發不聞於警急方古無事矣而財用未嘗羨盈昔用以千里用而足今以天下用而無餘其故何也豈今之經置不得其道耶將周官之載為虛文耶願陳所以異同之說以輔當世之宜

又

問孔子曰如有王者必世而後仁又曰善人為邦百年亦可以勝殘去殺若周至

成康漢至文景唐至貞觀皆有國未數十年而仁政治或刑厝不用或斷獄數百或報囚十九古稱至治之極何以尚茲宋興百餘年矣祖宗之休德主上之仁聖未嘗不以恤刑慎罰為意獄一有疑縱以予民吏或用法故深則廢而不錄如此刑宜省矣然而天下歲報重辟常不下二千其間忿爭賊害剽盜陵奪甚者骨肉相殘甘心仇怨皆法不可緩者習俗流敝而至是耶且必世之仁於周漢唐見矣以我朝之隆盛獨不見其成效歟至於善人不入於室猶能止惡而歸善以累聖之求治反未能致茲其故何也夫移風易俗使天下回心而嚮道蓋儒者之所願言也蓋陳古所以致而今所以未能省刑革敝興仁必有本末幸悉言之

又

問孔子曰如有用我者暮月而已可也三年有成孟子曰師文王大國五年小國七年必為政於天下矣此言為政者導民有漸非累久則不能成功故周公相成王六年然後治禮作樂以致太平是也而伯禽封魯三年而報政周公曰魯後世北面事齊矣又公孫宏報漢武曰周公期年而化臣尚竊遲之此則為政尚速也彼大聖賢且猶期年而為政必三年至於七年而後成功伯禽三年乃以為遲何也太公五月信未洽於民周公何以知後世齊強而魯弱公孫宏才不及古人而

以周公為遲然其相漢之迹其效何若此學古者所悉也試講論之

李惟幾改字說

李君名惟幾字景純問於予曰吾幼而名壯而始字夫字所以識其名而稱表之古人又從而規誠之說今惟幾之字景純既無識惟幾之意又非所以稱表規誠之道吾將易之久矣願吾子擇其宜稱者為惟幾之字焉非特以其所表然亦將蘄所謂自誠者於吾子耳予始重違其請又推朋友相字之說在禮則然而況李君才具優敏心志通達策名從宦有文而能政斯足稱道者又予頃年與之舉進士以里中子論交甚篤則正名為字之說今不得而辭也夫所謂幾者在事隱微而與知之之詞也故易曰幾者動之微吉之先見者也書載大禹之謨曰惟幾惟康云爾者蓋禹戒舜念慮幾微然後保其安康之謂也又舜作歌自戒亦曰惟時惟幾者舜以庶工既諧事之當戒者惟在知時幾微而已而仲尼稱顏子之善曰其始庶幾謂其舉動言行能慮之於微則其著也蔑有過事之謂也是則幾之為義遠矣淵乎古之聖賢之治天下也事君也修身也未有不念於是焉而臻其極致也且聖人之幾蘊乎誠明賢人之幾發乎思慮蘊乎誠明則不思而適乎中不勉而同其道所謂知幾其神者也發乎思慮者由勉焉而後得戒焉而後弗失

其顏氏之庶幾乎在易則曰不遠復在禮則曰擇善而固執之夫行之而弗思何曰能復復之而弗慎何云固執蓋顏子拳拳於斯未嘗少過故謂之殆庶幾者豈其思之詳而慎之至也歟噫事之未彰橫乎思慮是雖聖人賢人且猶念之戒之勤勤若是况衆人而不慎哉李君既求字於予因以求其誠焉是不忘乎立身之道也予又以朋友之義不得而讓故推原其說兼舉易與書之事以告之而命其字曰仲思庶乎李君早夜念焉遠慮而就正由是而之道云爾

題鄴侯家傳後

國相鄴侯家傳唐亳州刺史李繁撰述其父泌之事迹起天寶被召中間遷謫迄貞元中終於相位其所論著甚悉然與唐史小異文字亦有不倫次者蓋繁以罪繫獄謂其將死則先人之嘉謀密議遂不得傳因得廢紙敗筆於獄吏以成其藁且戒家人令求大手筆別加潤色然亦不果今崇文本第一至第五總五卷尤為踈略大類鈔節臣以私本校正凡增補數萬言以充定本云

題枯樹賦

枯樹賦故龍圖壽春魏公家傳云褚河南書其卷末題識止云貞觀四年為燕國公書而無書人姓氏于按徐浩書品云中宗時中書令宗楚客恩倖用事嘗賜

二王真跡二十軸因制為十二屏以褚遂良枯樹賦為脚大會羣賢張以示之薛稷崔湜輩見皆廢食忘息驗此賦河南書明矣然既用作屏而經本乃橫卷豈非後之好事者重裝背以便緘藏耶抑河南書此賦自有別本耶不可復知也觀其筆力適媚頗逼二王非河南不能為也而學者多云燕公于志寧也按志寧曾祖謹仕周開國封燕志寧貞觀末始襲祖封而此賦乃在未封前豈當時公卿自有封燕者而史失其傳耶或志寧嗣封當在前而書傳記之誤耶又不可得而詳也予愛玩其書因究其本末而誌於後

題維摩像

張彥遠古今名畫記所載顧長康傳云興寧中瓦棺寺初置僧眾設刹會請朝賢鳴刹注其疏時士大夫莫有過十萬者長康素貧打刹獨注百萬眾以為大言後請勾疏長康曰宜備一壁遂閉戶往來一月餘日畫維摩詰一軀工畢將點眸子乃謂僧曰第一日觀者請施十萬第二日可五萬第三日任例責施及開戶光照一寺施者嗔咽俄而得錢百萬又論畫體工用云顧生首創維摩詰像有清羸示病之容隱几忘言之狀陸探微張僧繇效之終不及至唐寺廢杜紫微牧之為池州刺史過金陵嘆其將圯募工搨寫十餘本以遺好事者其一乃汝陰太守某人

魚委公文集 卷七十一
四
也不敢攜去至今置於州解丞相晏臨淄公鎮潁日嘗語從事饒石以紀其始末
嘉祐壬寅予領郡事暇日數取以觀之案長康晉人故所畫服飾器用皆當時所
尚其意態位置固非常畫之比也或云杜本已為後人竊取今所存者蓋再經磨
搨矣然而氣象超遠彷彿如見當時之人物已可愛也况牧之所傳乎况長康之
真跡乎想慕不足因命工人即其本移寫藏之家楮又題於象旁丹陽蘇子容記

題右軍帖

予向見二王書帖多矣疑非真跡應是響搨然筆勢圓勁無毫釐之差都莫能辨
其是非所以辨者一紙數帖及用硬黃耳昔唐文皇好二王書天下訪求遺迹殆
盡彼時已患歲久恐遂磨滅因命搨書手趙模輩傳搨數百本藏之禁中或分賜
王公得之者已為秘寶矣故當時語云趙模一紙尚直數萬錢今觀說之所收一
軸凡四紙一十帖實奇跡也卷末題蕭祐者元和人起處士仕至桂管觀察使書
畫皆妙嘗教鍾王遺法蕭張筆勢編集真偽為二十卷上之又題凝式正臣則揚
少師也每紙皆有正臣字應是其家舊物也丹陽蘇某題

題御前卷子

左光祿大夫守尚書左丞蘇某恭覽太宗皇帝淳化中賜知州御前卷子親書三

十一字迄今八十餘年筆勢飛動翰墨如新對之歆然孰不悚厲者漢光武以手跡賜郡國一札十行細書成行故自臨邦宰邑者競能其官唐明皇除令長亦以敕書訓厲謂之令長新戒當時郡縣號為得人其猶載於金石之刻或見於詩人之咏歌以為太平之源由此其致猶未若神功恤民之勤為之精擇守長親書翰墨以遣之得其賜者超越前代規撫閱遠垂於無窮守臣奉之以為大訓不其偉歟

題胡考甫書華嚴經

大方廣佛華嚴經本序云佛為大心眾生說一乘道純真境界超絕權假當念相應即成正覺名雖十會指歸一貫通利者剎那見性泥文者多劫迷塗自晉至唐三經緝演其書乃完凡十萬正文總百千妙頌要言奧義包括萬殊前代名流留心探索則有論鈔贊圖開示末學入法界門大行於時子熙寧中赴東陽守道桐江失舟弟息及甥三人不救追悼不已因作毘盧文珠普賢三像以薦天橫通經義者以為正合教意今考父大夫服太夫人之喪三年齋潔書此經全部八十卷字皆端楷功已圓成仰報劬勞陰助冥福其勤至矣非特見孝子精誠之意抑可示導門誘掖之功因覽巨軸贊嘆不已因假翰墨題於入法界品之篇末云元祐七年二月初七日丹陽蘇某謹識

題青溪圖

予慶歷四年領邑江南六月馳漕牒之貴池適遇天章滕公過郡盤桓新居都官曾公退居州第相期為弄水之遊者數四臨青溪望諸山以琴棋消暑笑言甚適迨今五十年矣而未嘗再到公謝畫圖曲盡幽致言念歲月推遷二賢墓已木拱而老朽歸然覩物思人不覺感懷因識卷末

題送晉光序

晉光論書法猶釋氏心印發於心源成於了悟非口手可傳此誠知書者然當時名稱如此而不獨聞於後世筆跡絕少傳者豈唐人能書者多如先輩湮沒無聞不知幾何人耶觀諸公稱譽之言蓋非尋常僧流也

題灘院記

唐人多善書者題楷行草往往各盡其妙涉五代而字體衰矣獨楊公凝式號得筆法洛中碑記誌石刻官寺僧舍多其題識至今尚存校之一時墨迹固不類矣伯鎮所臨中灘浴室記是其書撰文格雖不甚高而詞氣宏贍猶有唐人之風範亦可嘉也

題應之詩

應之江表名僧能文章善楷隸南唐昇元保大間為內供奉中主後主書體與之相類當時碑刻多其寫者至今盡存惟江寧府保寧寺四注金剛經兼備衆體尤為精筆此詩乃其真迹也蘇某題

題張籍墨迹

張籍書世罕傳者予頃遊歷陽見僧寺有收得其墨蹟與詩刻今覽此帖疑昔所見者唐人大率能書籍雖非以書名然其用筆皆有法尤可佳也丹陽蘇某子容題

題名茶記

齊己詩人不以書稱在唐季二道既衰然此詩脫灑不俗筆札亦善信乎名稱於人必有可尚者子容題

題巨然山水

巨然山水擅名江表歸朝尤為當時貴重然而亦靳其筆故今傳者甚少惟學士院北壁特為傑作前賢詩記中多稱之烟嵐曉景是其措意者嚮見好事家一二小圖皆題此名說之所收持佳也子容題

題君謨草書

唐明皇有飛白散隸賜上巳曲水宴大字今尚存已為奇迹矣而君謨又作飛草

盡風雲龍蛇之變態非曲江可比也少自有得其真跡者說之此卷遂為奇寶矣
丹陽蘇某題

又

說之與予皆連君謨姻家情好亦均予嚮恃款密未嘗求其書而說之所得飛草
二軸其他真草又過是非夫好事之篤何能致其多也如此君謨今亡矣其書不
可復求故因披卷益增悵耳子容題

題授經圖

後漢永平七年明帝夢金人既寤以問羣臣通人傅毅對曰臣聞西方有神其名
曰佛陛下所夢將毋是乎因詔使者秦景等十四人如天竺至月支遇沙門攝摩
騰竺法蘭等傳其經像載以白馬還洛陽譯所得經為四十二章緘於蘭臺石室
遂流中夏右攝摩騰竺法蘭入漢獻經像圖人物十有一治平丁未在山陽傳史
中輝家藏本云其本搨成都佛寺右殿畫壁相傳漢魏間筆觀其衣冠服用若後
魏周隋制度疑彼時畫工創意所造耳蘇某子容燕寢北軒題記

硯銘

延平溪石研前此未聞熙寧丙辰建守李侯立之得於劍津遂以相寄云石出水

底數十仞溫潤而明瑩縝密而條達其堅不折其廉不剝蓋有玉之德焉琢而研之復益墨色端嚴龍尾不足多也予試之信然因銘其背云

其質則石其德則玉既漬既研利用縑牘

毫端可濡糜丸匪渝功施萬世四者相須

又

子容硯銘石出延平兩涯涘矩而琢之中厥器面如坳堂引涓水背如青圭去鋒銳比德於玉磨不磷罷龜而食文以治啟土建安邑丹陽世世寶用斯盡意

書帙銘

惟蘇氏世官學以儒何以遺後其在此書

誠

非學何立非書何習終以不倦聖賢可及

蘇魏公文集卷七十二終

贈司空蘇公墓誌銘

曾肇

建中靖國元年五月庚辰觀文殿大學士太子太保致仕蘇公薨於潤州計聞上輟視朝二日贈司空走中使賻恤其家葬事官給崇寧元年十一月丙申葬丹徒縣義理鄉樂安亭五州山之東北阜維蘇氏出帝高陽之後昆吾之子封於蘇子孫因以為氏在周忿生實為司寇其後建武父子純章祖孫俱顯於漢章後十有三世而綽威復顯周隋又三世而瓌頊相唐聲烈益大至本朝而公父子又以儒學顯公起書生致位丞相歷事五世為時元臣退老於家始終一德可謂盛哉瓌世家武功元和中曾孫奕卒光州刺史始家固始又四世孫益隨王潮入閩生光誨仕閩為漳州刺史居泉州同安遂為同安人當開寶末平盜有功歸朝擢左屯衛將軍官其十子左衛平盜時其子得盜所募人名籍千餘紙焚之左衛聞之喜曰兒有陰德其後必大是為公曾祖諱某贈司空司空之子舉進士不合改授武職終左屯衛將軍諱某贈太師福國公是生公考諱紳以賢良方正起家被遇仁宗入翰林為學士議論文采震耀一時有傳國史贈太師魏國公葬潤州故今為丹徒人公曾祖妣張氏祖妣劉氏翁氏妣陳氏封代隨徐魏四國皆太夫人公諱頌字子容性警敏甫能言應對不類常兒既就師學力省功倍未冠出舉進士輒

據上游是時魏公方處顯公深自刻勵敝衣徒步所交皆當世豪雋魏公任子當得京官辭不就再舉進士為別試第一遂中其科調漢陽軍判官不赴改宿州觀察推官徙知江寧江寧縣有能名丁外艱服除為南京留守推官歐陽文忠公時為留守政事一以倚公府賴以治皇佑五年近臣連章薦公召試除館閣校勘遷大理寺丞歷集賢校理同知太常禮院編定集賢院書籍在館九年廉靜自守宰相富鄭公韓魏公賢之問所欲懇求補外二公益稱嘆迺以知潁州仁宗山陵調發倉卒公為度土產有無高估緩期官自為市民不知擾而課最他郡潁人德之還為提點開封府界縣鎮公事建請浚自盟白溝圭刀四河以疏畿內積水增西北諸縣屯兵以備非常明年果有水蓄盜起長垣至賊殺官吏如公慮入三司為度支判官累遷尚書工部郎中出為淮南轉運使神宗自在藩邸聞公名及即位公適送伴契丹使次恩州驛夜火左右請與虜使出避兵叩門欲入抹公不為動閉門堅卧如常徐使守衛卒撲滅之是夕州人譁言虜有變抹兵亦欲乘間生事至聞京師使還上問公所以處之者稱善久之益知公為可用及使淮南入辭勞問甚寵數月召修起居注判尚書禮部祠部三司磨勘司太常寺熙寧元年擢知制誥歷知通進銀臺司審刑院提舉官告院判司農寺知三年禮部貢舉公在審

刑知金州張仲宣受財枉汪抵死法官援前比貸死杖脊黥配海島公奏古者刑不上大夫仲宣官五品有罪得乘車今刑為徒隸恐汚辱衣冠仲宣由此得免杖黥止流嶺外自是命官無杖黥者上方勵精為治急於人材大臣薦秀州軍事判官李定召見擢太子中允監察御史裏行知制誥宋敏求以定驟自幕職而升朝著任執法非故事與公及李大臨相繼封還詞頭不草制詔再下公公言祖宗朝天下初定故有起孤遠而登顯要者真宗以來雖有幽人異行亦不至超越資品今定非有積累之資明白之効一言稱旨便授御史浸漸不已恐高官要秩或以岐路致也疏入手詔召公對上引近詔舉臺官不拘官職高下為言且日格命久將得臯公對臣既知其不可若因召論遂變前言則是懷姦固位此尤陛下所當臯也退而又論舉官詔意不為選人設文時敏求前罷公與大臨更奏復下至於七八最後持以付公固執不行迺與大臨俱罷歸班而定御史之命亦為中寢公以守職不回絀人望益重賓客滿門日奉朝請雖風雨寒暑未嘗移疾家貧擔石不充無愠色歲餘會恩得知婺州徙亳州歸勾當三班院加集賢院學士未幾出知應天府時更三赦大臨已復從官而用事者抑公止授秘書監歲中復召為三班院知銀臺司會吳越饑擇守上曰蘇某仁厚必能拊安吳人乃命知杭州補

敗掠荒恩意戶至嘗會賓屬有美堂或傳隸將兵謀竊發州人恟懼公密使捕首
惡十數輩付獄終燕談笑如常坐客莫知也踰年召修國史提舉中太一宮進諫
議大夫元豐初豐知開封府聽決精敏上以為能會有人告僧犯法事連祥符舊
令孫純而所告法不當治公杖告者遣之或謂公縱純罪有詔推鞠獄成公坐失
出杖罪而已御史舒亶奏公與純連嫻不可以失論降祕書監知濠州是時公女
新嫁李徽之子純蓋李出於徽之屬疏李族大公實不知也公在開封嘗治國子
博士陳世儒母為羣婢所殺事獄具輒為法官所駁或謂公欲寬世儒夫婦上以
詰公且曰此人倫大惡毋縱有罪公對事在有司臣固不敢言寬亦不敢論之使
重既而公罷開封獄移大理寺大理奏世儒妻母因緣大臣有請於公又移御史
臺自濠達公赴對御史以言導公公曰使某誣人死不可為若自誣雖重得罪不
避手書數百言皆自誣詞也上閱獄詞疑不直詔更劾實御史推窮適大理丞賈
種民增損囚詞以為有請得其藁於獄吏家於是種民抵罪而公得白顧嘗因人
語及世儒惟箔事公應曰然以是為泄獄情罷郡歸班公雖坐吏議絀而上眷不
衰歲中起知河陽亶復言未嘗遽與潘郡公亦辭行改知滄洲入辭上曰朕知卿
久矣每欲用卿輒為事奪豈非命也如卿直道久而自明公頓首謝到滄數月復

太中大夫召判尚書吏部時豈知制誥論公復官未應法詔以舊官判公嘗建請歸諸司於尚書省以復唐舊至是命公詳定官制尋復太中大夫官制行罷集賢院學士進通議大夫吏部侍郎以詳定勞及車駕視省恩再遷光祿大夫母疾在告上恠不見公使樞密都承旨張誠一就問趨出視事會母喪再遣中人弔恤法賻外賜白金千兩元佑初服除授刑部尚書詳定敕令俄遷吏部兼侍讀改翰林學士承旨五年三月拜尚書左丞踰年拜右僕射兼中書侍郎公前後歷典四選銓綜有條士無留滯有自辨者人人使盡其說故雖不得所欲亦心服而去其修敕令必本大體為侍讀多所啓迪及登丞弼論議持平務循故事避遠權寵不立黨援進退人材弗專主己理有未當亦不苟從侍御史賈易坐言事出既復監司更赦除知蘇州公謂易論事不避權勢號為敢言更赦除州非允論於簾前未決而御史楊畏來之邵劾公稽留制書公即拜章待罪累上不許固辭老病八年三月罷為觀文殿大學士集禧觀使九月出知揚州明年除知河南府公力辭行復知揚州三上書還政授中太一宮使紹聖四年再告歸迪以太子少師致士今上即位遷太子太保堯年八十有二前堯一日猶接對賓客臨終神色不亂公天資閎厚有犯不校守杭日人或以事屬公不答既而其人當言路數排進公公不自

辨亦未嘗為人言也凡所施為主於寬恕故天下推為鉅人長者尤以禮法自持雖貴奉養如寒士築第京口僅蔽風雨比薨來弔哭者見其服用儉素皆歎息而去博學於書無所不讀圖緯陰陽五行星厯下至山經本草訓故文字靡不該貫尤明典故喜為人言疊疊不絕學士大夫有僻書疑事多從公質問朝廷有所制作公必與焉每燕見從容多所諮訪公必據經引古參酌時宜以對上未嘗不嘉嘆焉至於因事建明著在臺閣如論郭皇后當祔后廟侍講非師臣不當坐講之類其言甚衆益不可一二舉也修官制時議者欲分文武選於吏兵部上謂三代兩漢初無文武之別公奏唐制吏部有三銓今欲文武一歸吏部宜分左右曹以主兩選每選又以品秩分治之於是四選之法定焉它所訂正類如此上以契丹通好百年典章案牘往往散逸命公擴拾次比為書再期而成合二百五十卷書奏稱善賜名華戎魯衛信錄前後再使契丹熙寧十年冬至本朝厯先契丹一日公適在虜中虜疑彼此致慶當孰從公為言厯家算術小異則遲速不同各從本朝厯可也上聞善之嘗奉詔校厯因奏製渾儀時稱其工後日官言其非是詔近臣覆視以公法為密卒不能易也嘗與補注本草詳定天下印文多所釐正元豐中進士唱名於集英殿有暨陶者主司呼以去聲三呼不應公進曰當以入聲呼

之果出應上問何以知之公對三國時吳有暨豔造營府之論恐其後問陶鄉里
迺崇安人上喜曰果吳人也公為文章馴雅有體尤為宋元獻公兄弟所稱有文
集若干卷累勲上柱國爵公開國趙郡邑戶四千七百實食一千三百元妃凌氏
吳國夫人屯田郎中景陽女繼室辛氏韓國夫人駕部員外郎有則女六子熹嘉
朝奉郎駟朝散郎詒承議郎京奉議郎攜通直郎三女子二前卒左朝議夫夫李
孝鼎朝散郎劉瑄襄州錄事叅軍賈收其壻也孫男十九象先奉議郎處厚承事
郎德輿行冲季輔皆承奉郎某某未仕孫女十二嫁者六人曾孫男女十三人初公
從事南京杜正獻公尚亡恙嘗為公道其平生出處施設本末且曰子異日所至
亦如老夫其後公更踐內外以至得謝爵齒名德畧相似焉然則杜公可謂知人
已銘曰

蘇姓之興自周司寇列用中罰有蕃其後更漢逮唐史不絕書將相公卿父子紹
居遭亂南遷俟時而顯英英翰林施不及遠是生僕射為宋世臣德以承家學維
發身其學伊何海函山畜問無不酬鐘叩龜卜其德伊何玉質金相見於言行規
圓矩方不競不綵則維其常當義必爭君子之剛身有詘信色無放戚吾誰黨譬
人孰惡數晚躋鼎軸師保東宮五朝元老勇退齊終樂安之亭棲魄於此尚對前

休公多才子

見真西山先生續文章正宗

重刊先魏公文集跋

先魏公文集七十二卷宋槧本久已無存道光庚寅

廷玉

守蘇州陳恭甫太史來

書命就武林文瀾閣重鈔校鈔以公同好

廷玉

亟令人錄出副本乞序於太史太

史喜而序之後以官輒奔馳校讐未就每往來齊魯秦蜀車塵馬跡必藏行篋以自隨不敢忘也今歲歸里乃得陳念庭學博覆校之考證完善即付諸梓以畢十年心事時則道光壬寅七月也按宋史稱建中靖國元年公歿年八十二其年為辛巳距生之年則天禧四年庚申也登慶曆二年進士公年二十三紹聖二年乞致仕疏所云臣今年七十六歲仕官五十四年是也紹興九年己未文集始編成書汪浮溪序曰公歿四十年公之子攜始克集公遺文是也紹興己未至今壬寅凡七百又四年

廷玉

始重刊本書之顯晦於世固亦有待乎時如是耶夫自古聖賢建不朽之業者其精神常周於數千百年以後而使之聞風興起而况為其子孫者乎公嘗序小畜外集曰見於行事之謂德推以及物之謂功二者立矣非言無以述之無述則後世不可見而君子之道幾乎息矣若乃德與功偕文備乎道嘉謨讜論見信於時主遺風餘烈不泯於將來於虜此公之論人公之所以自道也昔子朱子稱為道學淵深履行純固始終一節出入五朝高風聳乎士林盛烈

銘乎勲府是蓋將比古之所謂大臣者而廷玉無似升沈宦海幾三十年其立德立功無能彷彿其萬一而徒懷景仰之思深歎 祖武之難繩為抱慙無地耳曩

在蘇州時

廷玉

曾得蔣氏所藏宋板魏公譚訓二本刻之恭甫太史為摘其謬誤

若干條茲仍重鑄以附於後近復得冷然齋集為公之四世孫召叟公所撰亦并校刊之以存一家言於以見明德之先澤綿綿延越至於今而乃益大顯於世也然非太史之留心文獻指以相示非諸君子之參互校讐以共成是舉又安能廣以傳布耶因敘緣起敬跋於後

道光二十有二年壬寅秋七月七日

裔孫廷玉謹跋

是書悉依 廷玉公重槧原本

同安裔孫萬靈錫經

逢年舜畊

晉爵耀庭

允恭子敬全校字

版底存同安蘆山本祠堂